



王氏女科醫學叢書

女科指南

蘇州國醫書社發行

全國新中醫之巨大結晶——中醫科學化之急進先鋒

中醫新論彙編

……現已出版了

主編者……王慎軒 助編者……張又良 談元生 朱溪裔 龔敏仁 唐景四
沈潛德 王德箴 王道濟 郁佩英 管慈之

本書五大之特色

- 1 內容豐富——凡中日漢醫之一切醫書醫報雜誌之精華無不采入
- 2 秘訣公開——凡中日漢醫之一切經驗奇效之秘方無不明白宣佈
- 3 選輯精嚴——凡學說陳腐方法偏僻不切實用不合科學者均不取
- 4 材料新穎——凡所選各篇均係中西合參確是中醫科學化之名著
- 5 評按明確——凡每篇之後多有名醫王慎軒先生之按語尤為名貴

本書之十二總目

- 〔生理學 病理學 藥劑學 方劑學〕
- 〔治療學 傷寒學 內科學 外科學 女科學 兒科學〕

讀此一書。勝讀各種醫書醫報雜誌數百種。

(定價)每部四厚冊 實價洋五圓 外埠寄費加一 外國寄費加三

總發行所……蘇州吳趨坊一百三十七號……蘇州國醫書社

凡例

一大道全體由之易知之難欲其知之不反覆致詳何由得乎管見曉曉殊覺其贅良欲使難者歸於易耳

一治病之法有經有權經者道之常權者道之變蹈常履變固因乎病施經用權悉在於人信得其權當不以經爲例

一病有取脈爲憑者有取症而舍脈者蓋以望與聞問與問之餘尙有疑而難定以故取之一決非專主於脈而治病也每見侈談脈理者云病可以不說脈自了然脈之爲脈果如是乎篇中罕論其理非偏且略也當以爲例

一藥性不明無以療病但知其性不善其用雖明何益是必窮之至盡而得圓轉之妙始得以善其用篇中輕僅分許重必至兩者咸以君臣佐使之宜然耳非孟浪也

一病名則一而致病不同者當審其病之由來而後立方然後病可得而治不然病名則是病源則非雖有金丹其克治乎篇中從經分絡各用治法俱有驗法可鏡且有醫案爲憑一凡一體患一症者是書各立條例閱者自是了然儘有一體兼患二三症者必取二三條合參焉然後審其病之或孰輕孰重孰緩孰急何者宜先治何者宜後圖何者宜合用何

者爲主宰何者宜爲引導若不並舉互參必至單病可醫兼症無措矣閱者心領神會焉可也

一調經方論前人主於溫補者恆多篇中寒涼獨進剋伐兼施者良以病在則從非嗜偏也
一胎前諸症前人大都以安胎爲主然必究胎之所以不安者由於病病去胎自安篇中專於治病而不云安胎者欲潔流先澄源之法也

一胎產之難前人催逼之劑良多然後時之弊尙緩先時之弊可駭必正產之候齊見方克有濟篇中諄諄反覆良加苦心也

一產後諸症前人主於溫補氣血雖有他症以未治之然必視其孰輕孰重孰緩孰急孰當養正孰當驅邪然後處方庶不致誤篇中輒用苦寒頻施驅蕩病之宜事則然耳咸有治驗可徵非浪語也

一治病必求其源舍其本而求其末無益也當審其病之根底何在必致力就擒其主然後餘可自降也不然日孜孜於治病而病終不能治矣

一湯散丸方皆苦心蒐討推敲於理之至極而出非泛泛臆度任意者故對症而施靡不奏効幸高明勿以爲妄

女科指南集目錄

卷一

經候門

經原論

月水本太衝不屬任脈論

調經門

調經總論

月經先期屬血熱論

月經後期屬血虛論

月水紫黑成塊屬大熱兼瘀

月水色淡屬血虛火衰

臨經腹痛屬氣滯

經後腹痛屬血虛

倒經屬火載血騰

併經腹痛屬氣滯血虛有瘀

經行身痛屬氣血兩虛

月水乍多乍少忽前忽後屬陰陽不和

漏經

不月屬血枯

不月屬血隔



3 0466 4741 2

不月屬痰滯

不月屬心事不遂

熱入血室

血崩氣血俱熱

崩漏屬瘀積不消餘熱未盡

血崩暴虛

白帶屬濕熱附赤帶

白淫屬鬱火無制

卷二

廣嗣門

求子須蓄男精論

求子須調女血論

原始論

胎前門

驗胎法

保胎八要

孕婦忌食

孕婦忌藥歌

胎教附轉女爲男

逐月將息論

惡阻屬氣血積聚攻胃

惡阻屬壯熱衝胃

子煩屬熱氣衝心

子煩發渴屬壯火燉金

子懸屬濁氣舉胎上湊

子滿屬脾虛不能制水

子氣屬脾虛濕熱氣

胎痛屬肝腎血虛

妊娠腰痛屬房事不謹

妊娠腰痛屬勞力不節

妊娠腰痛屬風寒所襲寒溫不散

激經屬氣血有餘

胎動胎漏屬衝任氣虛

赤淋尿血屬小腸膀胱積熱

激經胎漏尿血辨

子淋屬心肺移熱於小腸膀胱

轉胞屬火逼胎繫下墜

轉胞屬胎元虛弱下墜

子瘖屬胎氣充實

子癰屬賊風所中

子嗽屬風火乘金

子嗽屬肺冷金寒

子瘡屬三陰之邪

妊娠目暗屬胎熱

妊娠悲傷屬臟燥

乳泣腹啼

傷胎斃胎辨症用藥

半產屬胎元不固熱病纏綿

墮產牛產漏胎辨

妊娠痢疾總論治例七則

胎前傷寒總論治例五則

胎前霍亂痧脹

鬼胎屬女人淫液所結

輯羅謙甫腸覃石瘕論

卷三

臨產門

臨產總論

臨產辨生死法

臨產離經脈

臨產斟酌九則

產論十二則

臨產交骨不開

難產屬安逸氣滯

難產屬敗血壅滯

難產屬胞漿短少

難產屬精力虛乏

初產門

初產須知十五則

息胞屬血流脹滿

息胞屬氣虛難送

產下舌出

兒枕痛

玉門不閉

卷四

產後門

昏暈總論

昏暈屬敗血上奔

昏暈屬痰火泛上

產後昏暈屬元氣虛脫

產後惡露不下屬寒阻

產後惡露不下屬熱阻

產後惡露不止屬脾虛血熱

白惡露屬氣虛不能運化

產後狂越屬痰火迷心

產後狂越屬瘀迷積心

產後驚悸屬心虛

產後不語屬痰壅

產後腰腹痛屬血虛空痛

產後驚悸屬痰鬱

產後腰腹痛屬氣凝血滯

產後腰腹痛屬氣凝血滯

產後汗多一屬陽蒸一屬熱蒸

產後汗多一屬陽蒸一屬熱蒸

產後寒乍熱屬表氣不固

產後寒乍熱屬表氣不固

產後遍身痛屬虛風

產後敗血流經

產後羸勞

產後淋瀝屬膀胱積熱

產後遺尿

產後乳汁不通

產後月水

雜病門

前陰諸疾

乳疾



科指南集卷一

申江戴武承著述

古越王慎軒校訂

長女王景賢參校



經候門

經原論

嘗謂男子象天而動。女子法地而靜。動者陽也。氣也。靜者陰也。血也。動則運而行。靜則停而止。運行者無積而常虛。停止者有蓄而能盈。盈則依時而溢。旨哉。月信時行。必本於血室之充乎。血室者何。人生之衝脈也。衝脈主調攝諸經之血。爲血之衛護。其脈與陽明之經相併。夾臍上行。而直達起於胞中。出於氣街。前行於胸。後行於背。上出頰額。滲灌諸陽。下入於足。洒注諸陰。爲十二經脈之海。故曰太衝脈盛。月事時下也。第天地萬物。皆本於陰陽。陽非獨陽。獨陽則不生。陰非獨陰。獨陰則不成。謂之天癸者。天爲天真之氣。癸爲壬癸之水。壬爲陽水。配丁而化木。癸爲陰水。合戊而化土。可見陽中之陰。陰中之陽矣。况男子爲陽。陽中之數八。故一八而陽氣升。二八而陽精溢。女子爲陰。陰中之數七。故一七而陰氣升。二七而陰血溢。神哉。坎離二卦。五行生發之源。萬象森羅之本也。夫二七而天癸至。每月而經行。其血上

應太陰。下應潮水。不失其時。故名月信。乃有不能如期者。良以人之稟受。有先天後天之殊。得於後天者。可治而愈。本於先天者。非人之所能爲也。有如未至二七而天癸至者。稟先天之氣旺。其性大都機巧。逾十四歲而後經行者。稟先天之氣薄。其質大都魯鈍。經水每月當洩。若三月一至者。居經也。一年一行者。避年也。一生不行而受胎者。暗經也。更有月信已通。或半載或一歲。倏爾經閉不月。至三四年以後。不假藥石之功。自然依期而復下者。名曰歇經。其狀與經閉酷似。但毫無疾病之爲異耳。茲數者。方書皆以氣血有餘不足爲言。然俱本於先天。而不可測者也。至於後天之疾。並詳下文。

月水本太衝不屬任脈論

任脈者。起於中極之下。以上毛際。循腹裏。下關元。至咽喉。屬陰脈之海。任者。妊也。人生身生養之始。胞胎繫於此脈。而調攝諸經之榮。能令妊娠不擾而胎安。故曰任脈。蓋曰任胞胎之脈也。經曰。任主胞胎。衝爲血室。又曰。血海。血有餘。月事時行。則知經血之屬於太衝。而不本於任脈也明矣。允若茲。方書所云。衝任二脈。爲月信之源者。然則不可法歟。非然也。血脈宣通。蘊精成孕。女子月候已行。可合陰陽而有子。二脈原屬相依。分而爲二。合之則一。以其分

而言。任主胞胎。衝爲血室。以其合而言。衝爲胞胎之本。任爲胞胎之繫也。往哲云。任脈通。太衝脈盛。月事以時而下。亦統而言之耳。豈謂必本於任脈哉。第泥古者。未能悉取其旨。而融會之。未免顧彼而遺此。

調經門

調經總論

病不外乎寒熱虛實。藥不越乎補瀉溫涼。女人以陰血用事。故女科以調經爲首務。然症不一端。有緣於本虛者。有緣於標實者。有本虛而兼表邪者。有外感而兼內傷者。難以枚舉。更有陰症似陽。陽症似陰者。一時變遷者有之。經年累月者有之。其症尤難測識。究不出乎寒熱虛實之間。一一參詳。細求其故。於若寒若火似虛似實之地。偶窺其呈露之一而推之。全體之隱伏自昭。而眞僞立辨矣。費子云。治病易。識病難。識病易。明理難。理得其明。其於病也何有。

月經先期屬血熱論

陽氣爲衛。陰氣爲榮。榮行脈中。衛行脈外。二者相制宜平。而不宜勝。平則正得其安。勝則邪

得其助。其如血常不足。氣常有餘者乎。丹溪云。氣有餘。便是火。火之爲物。其性甚烈。其發又暴。本陽剛之性。而爲急速之用。則運動之爭先而直前者。莫火若矣。夫如是。經之先期而至者。其爲血熱也可知。血屬陰爲寒。乃變而爲熱者。陽過極而移禍於陰也。調治之法。莫如涼血清火。涼血如生地丹皮甘菊。清火如條芩山梔玄參。重則土炒黃連。血被火囚。眞陰之氣。必爲其所耗。故用白芍以斂其陰。然芍藥之性酸。酸則恐其收斂無遺。得丹參當歸爲挈領提綱之主。陰氣漸而上升。不至萎靡而斂攝於內。且丹參性走血分。兼走氣分。能行能止。兼補兼消。四物之功。莫出其右。爲諸藥之主宰。而俾氣血和調。陰陽不乖。自然依期循序矣。

月經後期屬血虛論

經本血室之充。期至二旬而溢。誠哉盈則流通。虛則止守之言也。夫血屬陰而象水。行止與水髣髴。既屬相似。請以水喻。孟子曰。源泉混混。不舍晝夜。盈科而後進。放乎四海。其解曰。有源之水。混混然而湧出。無日夜之休息。及其遇坎而止。必盈滿於此。而後漸進於彼。由是沛然莫禦。必至於四海而後歸宿焉。又云。流水之爲物也。不盈科不行。釋曰。積水尙淺。未至盈滿其科。則止而不行。夫心生血。脾統血。血本於心脾。如水之有源也。諸經之血。洒陳於太衝。

若水之止於科也。血海有餘而經行。猶水之盈科而後進也。苟或七情內傷。六淫外侵。飲食失節。起居不時。漸至心脾虛損。則生化之源。失其長養之職矣。迨至臨經而血室尙未充滿。自然過期而始下。不猶夫流水之不盈科不行乎。此後期之所以屬血虛也。宜以八珍湯。加黃耆丹參治之。夫有四物以補血。四君以補氣。氣血之功。已備。何必更用夫他哉。抑知藥力不全。終慮有虧。書曰。氣有生血之功。故用黃耆以助氣。得耆充實。亦得云全。而更用丹參者。良以補血之功最難。丹參一味。有四物之功。俾爲養榮之領袖。庶無不及之虞。書云。氣血交修。調經要旨。嗚呼。盡之矣。

月水紫黑成塊屬大熱兼瘀

氣爲陽。血爲陰。陰隨陽轉。運用從之。緣血爲氣之配。氣爲血之母也。氣熱則血亦因之而熱。氣滯亦因之而瘀。經色紅潤者。稟火色之理也。乃有紫而黑。結而成塊者。非氣熱兼瘀也乎。經曰。亢則害。承乃制。熱劇反兼水化。故熱則紫甚而黑也。且婦人之性。大都鬱怒嗜慾倍加。五志厥陽之火。無日不起。若寒冷所傷。則凝結不行矣。豈有行而紫黑成塊哉。治宜生地丹皮條芩黃連以清火。香附山梔以開鬱。青皮紅花玄胡以導瘀。重則益母以散之。更用當歸

桃仁丹參以去舊生新。庶無剩義。今人見紫黑成塊者。率指爲風冷乘之。而輒用溫熱之藥。禍不旋踵矣。

月水色淡屬血虛火衰

夫造物之雨暘時若。而無旱乾水溢之歎者。得陰陽之中和也。人身之百脈和調。而無寒熱盛衰之疾者。亦本於陰陽之中和。何則。偏於太過則實。偏於不及則虛。女子之月水。所以候其陰陽之愆伏。知其一身之安危者也。其形象水。其色象火。血旺而陽盛則紫。血虛而火衰則淡。以南方之位。象離而色赤。爲動爲陽。血屬陰而靜。乃其色赤者。陰中有陽。而稟火色也。故天癸之色紅而光潤。斯爲正耳。若血旣虛乏。火復衰少。則陰陽交虧。二脈俱竭。不惟火不能制水。水反得以乘虛而侮火。血色不由此而淡乎。治宜益火之本。以消陰翳。壯火之虧。以滋化源。則火旺血行而色正矣。

十全大補湯 人參 茯苓 白朮 炙草 當歸 白芍 川芎 地黃 黃耆 肉桂

臨經腹痛屬氣滯

人身之氣。得太極之陽。而神爲之主。輕清象天。源於太虛。本於剛健。無形而爲有形。君主無

體而能體。物爲生命之根。陰血之宰。是故血之行也。隨氣而動。氣行則血行。氣止則血止。氣順則血順。氣逆則血逆。婦人從事於人。凡事不得專行。每多憂思忿怒。憂思過度則氣凝。氣凝則血亦凝。忿怒太甚則氣結。氣結則血亦結。氣血凝結。則澀而不流。期至二旬。時當洩矣。乃當洩而不得遽洩。則搏激於經絡隧道。而腹有不痛者乎。內經所謂百病皆生於氣也。治宜疎氣和血爲主。疎氣如廣皮。香附。青皮。蘇梗。木香。砂仁。烏藥之類。和血如酒炒延胡。白芍。藥益母。炙甘草之屬。病得其真。藥以應之。自然隨藥而奏凱矣。

三香丸

香附一斤
童便製

木香二兩

沉香五錢

荷葉湯泛丸

經後腹痛屬血虛

人生之血。得太極之陰。重濁象地。稟輕清之氣。以成其體。而具資生承剛健之氣。以厚其用。而主長養。其體易於不足。而難於滋補。血室不足。則人身之本體已虧。當其蓄而不洩。尙慮其虛。矧值經期而復施泄者耶。其爲血室之空也何如。空則資生之令不行。長養之能失職。榮血枯槁。而無以灌漑臟腑。則腹痛於是乎作矣。驗其六脈微弱。痛如芒刺。按之稍緩者。始

爲真也。以十全大補湯加丹參首烏治之。外有月水澀滯。餘血未盡。凝滯於少腹。按之板而益痛者。非前方所能療。以芎歸丹參桃仁赤芍延胡益母青皮香附之類。俾瘀積淨盡。腹痛自止矣。

倒經屬火載血騰

經行之循度也。得水火既濟而已。未濟則水火各自爲用。而皆失其位。有臨經而血從口鼻出者。名曰倒經。其症屬火。試詳言之。夫離需坎應。方爲既濟。坎離交泰。始成少火。故分火論云。久而不輯。將自焚矣。甚矣。火之爲物。其性上炎。其氣高竄。恃其剛健之性。而一往莫禦者。惟火然乎。是以六淫之中。火之爲用最厲。厲則猶夫車薪之火。杯水不足以制之。不得其制。則火旺而水衰。任其縱橫奔騰。而於陰血行動之時遇之。有不載血上溢而妄行者乎。輕則月信尙有。重則經水絕無矣。治以生地爲君。佐以山梔丹皮黃芩犀角。色如紫艷者。加桃仁赤芍以散之。湧出不止者。加大黃黃連以奪其勢。搗茅根汁和於藥內。然經當下。行。今反上沸。必用磁石牛膝以俾其達下。庶得平復。能得箇中之妙。不求合矩。自不踰方。斷不可拘於臨經忌寒藥之法也。

併經腹痛屬氣滯血虛有瘀

夫月水應期而下。猶太陰之缺。而不使有餘也。乃有過期不行而腹痛者。何哉。良以重濁之血。屬陰而靜。輕清之氣。屬陽而動。陰隨陽轉。陽動而血從之。此所以月信時行。無慮先後之患也。設或氣滯不舒。則榮血無所稟承。而運動失度。失其常道。痞塞留停。血自凝結成瘀。病之腹痛經止。難乎免矣。若然。其源獨歸之於氣滯血瘀乎。不知血室充實。經候依期。過期不行。血之虛也。又是了然其候。或月餘一至。或二月一至。或百日一至。大抵來則凝結者居多。治法若單消尅。則元氣飛越。單養榮則瘀積牽制。因知是症有三治焉。一則培養之法。芎歸丹參芍藥是也。一則流通之法。香附青皮烏藥牛膝是也。一則推陳之法。蓬朮桃仁元胡靈脂是也。三法並進。庶無餘蘊矣。

經行身痛屬氣血兩虛

女子之月經。行氣血。通陰陽。以榮於一身者也。氣盛則陰有稟而形氣通。血盛則陽有配而榮衛暢。故衛之盈虛。關乎榮之虛實。氣若一虛。一身不得其轉運矣。夫血從氣者也。氣且虛矣。有血而反充者乎。虛則外虧衛氣之充養。內乏榮血之灌漑。一體兩虛。則中空無主。其能

免經行時之體痛乎。然則治之何如。經曰。衛不足。益之必以辛。榮不足。補之必以甘。甘辛相合。脾胃健而榮衛生。吁。信哉。

肉桂 白芍 川芎 當歸 人參 黃耆 白朮 丹參

熟地 茯苓 續斷 炙草 杜仲

月水乍多乍少忽前忽後屬陰陽不和

夫月水之依期也。得氣血中和而已。中則無過不及。和則無所乖違。一有偏枯。病其立應。偏於不及。則陰氣乘陽。而血不運行。偏於太過。則陽氣乘陰。而血流散溢。猶之天寒地凍。水結成冰。故令乍少而在月後。天暑地熱。水溢沸騰。故令乍多而在月前。此皆陰陽違和。行失常道而然也。是症不宜單攻單補。單補恐其助陽而熱沸。單攻恐其益虛而寒凝。一以和平之劑調之。挽其歸於中正而已。

生地 熟地 丹參 丹皮 元胡 白芍 香附 烏藥 甘草

丹參散

丹參一味不拘多寡爲末酒服

漏經

經之行也。榮衛虛弱者。兩日而淨。陰陽調和者。三日而淨。氣血旺盛者。四五日而淨。行止之常道則然也。乃有數日不止。半月淋漓者。此其故何耶。書曰。寒則凝滯。熱則流通。太衝爲邪火擾害。失其調攝之令。則經血無以約束。而任壯火奔潰。自不能依期停止而妄行矣。內經所謂熱淫血溢是也。治宜清火以澄其源。涼血以潔其流。補塞之劑。不可犯以纖毫。若以阿膠地榆之類。而強止於一時。若爲治安偶觸其鋒。則變爲崩中之症也。以涼血正經湯治之外。有色淡寡少。脈細倦怠。毫無燥熱之症者。脾虛不能統血也。可用養榮斂血湯。

涼血正經湯

生地 丹皮 延胡 白芍 條芩 山梔 柴胡 元參

蓮房 甘草

養榮斂血湯

歸身 白芍 阿膠 熟地 川芎 茯苓 白朮 山藥

扁豆 黃耆 加大棗

不月屬血枯

枯者。竭也。血液耗散。漸爲不月之症。其原由於胃無生化而致也。何則。胃爲水穀之海。會於氣街。主化榮衛而潤宗筋。女子經血不行。雖本於太衝脈盛。而實陽明已土之生化主之。所以心脾之病。最足傷胃。胃與心。子母也。人之情慾。本以傷心。母傷則害及其子。脾與胃。表裏也。人之勞倦。本已傷脾。臟傷則患運於腑。化源虛損。則內而傷精。外而傷形。恃之以灌溉周身者。尙慮其竭絕而無幾。安望其臨經而復有餘血施洩乎。其症面顏枯槁。唇色灰白。飲食少進。精神困倦。六脈微弱。或當大病之後。或本來淡紅寡少者。方爲的候。治以柏子仁爲君。佐以參耆白朮四物丹。參川斷以補諸血。氣滯者配木香。烏藥。延胡。香附。俟其元神健旺。然後加牛膝以通之。總之補血之功最難。必大劑進之。方克奏效。

不月屬血隔

隔者。阻也。血本不虛。有瘀積凝滯胞門而逆也。蓋太極之陰。行止本於太極之陽。陽氣運動。則陰血從行。衛氣鬱遏。則榮血凝結。結而不散。則往來流行之度。出入升降之道。被其阻塞。窒礙而不通矣。所以有月事不下之症也。其症少腹板硬。按之悶痛。寒熱似瘧。合之於漱水。

不欲下嚥。其爲血隔經閉。端的無逃矣。治宜推陳致新爲主。以桃仁、丹參、香附、紅花、元胡、牛膝、蘇木、蓬朮、歸尾、馬鞭草、寒熱似瘧甚重者。加秦艽、柴胡。熱重者。加鼈甲。寒重者。加肉桂。更用琥珀丸間服。俾舊血消盡。新血自下。若不究其病之根底。而概用養血以冀經行。吾恐求千金於乞丐。必不可得矣。

太極膏

用馬鞭草根苗

血見愁各五斤剉細。水五斗。煎至一斗。去渣。別以淨器熬成膏。食前

溫酒調下。一方用蠶沙四兩。炒半黃色。無灰酒三斤。煑去蠶沙。溫飲數盞。卽通。

不月屬痰滯

痰之生也。由於濕。乃津液所化。行則爲津。止則爲痰。流則爲液。聚則爲涎。升降往來。隨氣而動。遍身上下。無處不到。客於胞門。則爲不月。以其凝滯隧道。阻塞經絡而然也。其故隱微。難以測識。然症雖隱伏。鋒穎自露。若有起居如故。飲食如常。體微色白。飢則神清。飽則倦怠。脈來弦滑。至於全無等象。皆痰之見症也。則知經之不行。非無血也。爲痰所阻而不行也。脈接不起。非血衰脈絕也。積痰生熱。結伏而脈不起。爾。大宜宣通之藥。如蕩胞湯、滾痰丸之類是。

也。兼進疎氣利導之劑。如車前、牛膝、木通、蘇梗、砂仁、烏藥、丹參之屬。胞門清徹。經血自下矣。

不月屬心事不遂

夫男子精旺則思室。女子血旺則懷胎。其事雖由於精血。其情實本於心脾。蓋心能生血。而脾爲之統。脾志存乎思。而心爲之主。二臟原屬子母安危相係。易曰。坤厚載物。德合無疆。信乎土爲萬物之根基。一身之樞紐也。然憂愁思慮則傷脾。脾傷不惟心經連患。而且一身之盡虧矣。且女子之情慾。與男子十倍。當其月水方通。萌芽猶未動也。迨至於笄。意志漸開。時及二九。氤氳之氣。難以遏絕。此時若有良辰佳會。自然陰得陽合。而百脈和調。體常舒泰矣。褚澄云。經行後十年無男子合。則不調。內則曰。二十而嫁。正未逾十年。而預防其不調也。若夫年已逾二十。離火旺而坎水足。厥陽之火。無日不起。聽鷓鴣鳴而感嘆。覩雙燕而情深。慕貞者春心未動。感懷者腸斷興悲。設或正言法語。猶可直告而舒懷。至二五之欲。莫可假古以明今。如是而鬱怒憂思。與日俱增。久則心脾二經。爲其桎梏而受病。心脾化源已絕。始也不調。繼也漸閉。毋論爲勞爲瘵。莫不由此而起。其症朝涼暮熱。面黃肌瘦。飲食減少。神思自有不樂之狀。得其情由。豈必待醫者而後愈哉。爲父母者。可以治之矣。雖然不特女子爲然也。

男子亦爾。時方志學。人心常聽命於道心。及至己冠。慾心自動。雖有內作色荒未或不亡之誠。亦不足以馭其耳目心思。而必至發爲淫濁之症也。吁可慨者。不知凡幾少年矣。用藥以解鬱火爲主。

白芍

歸身

條芩

山梔

香附

丹皮

丹參

蘇梗

甘菊

元胡

鬱金

柴胡

砂仁

熱入血室

何爲血室。人身衝脈也。何爲熱血入室。臨經感冒風寒。鬱而爲熱。以至入於太衝而爲病也。然非衝脈本經自熱而致。緣以人平素多逆氣。致衝脈開受病之門。或經期適至。或月信方止。血室不能自衛。其能免熱邪之不入乎。一入其室。血必瘀阻。症多眉宇不開。難以轉側。臍腹上下兩旁。按之硬痛。或譫語。或叫喊。或寒熱似瘧。恆有妄見。大多日輕夜重。衡其血瘀而輕者。劑以生地、赤芍、紅花、丹皮、荊芥、青皮、柴胡、黃芩。瘀積重者。前方加大黃、芒硝、桃仁、延胡。若前有血症而虛者。於輕劑內加芎歸、丹參、製首烏。邪陽熾重者。於重劑內加黃連、犀角。熱如炮烙者。加石膏。是症不宜汗吐。恐重洩其液。而反增其燥也。

血崩屬氣血俱熱

夫血爲氣之守。氣爲血之衛。血行脈中。氣行脈外。升降上下。一循乎經。何自而有崩中之患哉。緣以烈熱衝突其經。血爲火逼而妄行耳。經曰。陰虛陽搏謂之崩。崩者。其血暴下。若江河決而崩潰也。陰虛者。非陰自虛。邪陽擾害。令其不能藏血而虛其職也。陽搏者。相火亢極。觸其陰分之血而搏其行也。且厥陰之經。環陰器。廷孔。前陰皆屬之。肝經之火。助心火之勢。而君相互煽。陰血自不能存養而泛濫矣。因見血溢之由成。非熱不致。熱不過極。血無洶湧。猶之水沸於火也。沸豈水之性哉。欲救其水。必去其薪。故治血溢之症。必主於清涼而帶破瘀。斯爲探本窮源之法。何也。蓋血之瘀積。猶夫水有洄瀆。木堅成節。彼離經之血。既不得須臾淨盡。而又不能復歸故道。將蓄之何用乎。所以治者。必以生地、丹皮、荊芥、芩連、山梔、滑石、柴胡、甘草。以清火涼血。桃仁、赤芍、青皮、丹參。以去舊生新。更佐之以烏龍奪命丹。尤爲合局。然此皆正治之法也。設或熱勢縱橫。其鋒熾盛者。前方加大黃錢許。以斬將搃旗。諸藥亦與有力焉。司馬氏曰。正不獲。則用權。血崩而用大黃。其亦用兵之權法歟。

丸方邪陽退者聽用

黃連

人參各五錢

生地

製首烏各八兩

龜膠

歸身各五兩

甘菊

丹參各四兩

丹皮

白芍各三兩

黃柏

葳蕤各二兩半

人中白

細黑豆各二兩

爲末煉蜜丸服

崩漏屬瘀積不消餘熱未盡

崩漏二症均爲下血。然有因崩而致漏者。有因漏而致崩者。崩而不漏者。間或有之。未有漏而不崩者也。何也。崩爲血熱妄行。以寒藥勝之。而火邪退。則其崩卽止。漏則血既暴下。而復時時施泄。其原由於瘀積不消。而餘熱未盡。勢終寬緩。第爲漏而不崩。若敗瘀停蓄於隧道。往來升降之血。日積月累。蓄積既多。而餘熱復熾。雖有參耆之隄防。芩朮之版築。能不沛然而莫禦乎。所謂漏而致崩者此也。其症腹先繞痛而來者。便爲瘀積。夫腹痛者。卽爲瘀血。遞而推之。紫且黯者當何如。紫黯而更堅凝固結者又何如。堅凝固結而更成塊成條者又何如。成塊成條而更血翳包裹者又何如。此等惡症。非謂血崩者皆如是。亦不得謂血崩者無是症也。溫補之法固非能事。卽極清極涼者。亦不得爲盡善矣。必也破其凝滯之血。而佐以清熱之藥。斯爲良法。或者疑而相詰曰。破瘀之藥。斬關奪門之劑。瘀血當之。尙屬相宜。於

新血獨無所虧乎。不知有病則病受其藥。則消熔在瘀血。瘀血消熔。則新血不爲梟邪桎梏。自然融通灌溉而循經矣。不第於新血無損。正爲救護新血之地也。且議方必以丹參爲君。桃仁爲臣。地龍爲佐。益母爲使。四味皆能去舊生新。與新血毫不相犯。其餘亦不過紅花、赤芍、青皮、延胡。矧有生地、丹皮、黃芩、山梔。以養榮止血乎。假令不驅蕩也。以爲補益之地。卽欲峻補以生養新血。其如瘀積者。已填塞中宮。使新生者。又復置之何地耶。前條重以涼血清火。而佐以破瘀者。是預防崩而致漏。漏而致崩之意也。讀者其深思之。

丸方

生地

丹參

製首烏各八兩

丹皮

桃仁

黑豆各四兩

甘菊

延胡

歸身各三兩

山梔仁

紅花

茯苓各二兩

爲末蜜煉丸服

凡崩漏日久。純下臭濁黃水。或帶紫黑筋塊。腥穢不堪者不治。或瘀血崩脫。少腹不痛。後變陰戶腫突。痛如刀割者。死期迫矣。

血崩暴虛

凡崩症去血過多。見症畏寒拘縮。面白唇灰。六脈全無。神情倦怠。口眼懈開等象。此血脫也。

症雖屬火。然暴亡則虛。急服獨參湯。隨煎參耆。丹參。生熟地。歸身。茯苓。白朮。龜板。治之。然必察其症狀如右者。庶不爲似是所誤也。

白帶屬濕熱附赤帶

帶脈者。奇經八脈之一。起於少腹季脅即章門穴之端。環周一身。絡腰而如束帶之狀。因名曰帶。帶下者。婦人陰中濁液。白滑粘膩。形如涎涕者。綿綿下注。從帶而出。故曰白帶。其原由於氣分爲濕熱受傷而致。蓋濕者。土之氣。土者火之子。故濕病多是熱生。以火熱能生土濕也。濕熱之氣。滲於帶脈之間。客而不散。則津液必從其煨煉而爲穢物。如火之鎔金者。然熱極反兼水化。故經曰。少腹冤熱。洩出白液。冤者屈滯也。病非本經所致。爲他經冤熱而成此疾也。其症多無痛楚。或臍下痛者。或穢臭不堪近者。皆濕熱之最盛者也。驗其脈來弦細。足脛常浮。腰腿酸軟。面色痿黃。臨經寒熱往來等症。帶下之病無逃矣。治宜利濕清熱爲主。以苦參。葵花。白芍。爲君。佐以蒼朮。香附。木通。澤瀉。滑石。赤苓。車前子。熱甚加黃連。濕甚加椿白皮。血虛者加芎歸丹參。俾濕退聽穢液自淨矣。外有形如紅液者。名曰赤帶。濕熱更熾。連傷於血分故也。前方加涼血之劑主之。

丸方 苦參三兩 雲母粉一兩五錢 葵花 椿根皮 白扁豆花 白芍 香

附 牡蠣各二兩 滑石四兩 研細爲末蜜煉丸服 一方 用蕎麥麴鷄子清爲丸清

晨滾湯送二錢 又方 破故紙炒爲末將鷄子一個開一孔入末八分攪勻用紙封

固蒸熟空心酒下重者十服卽愈 白帶灸中極穴在臍下四寸

白淫屬鬱火無制

夫二五者陰陽也。陽有陰合。則非孤陽不生。陰得陽配。則非孤陰不成。陰陽睽隔。則水火不濟。而淫濁之症生矣。男子姑無論。惟女子之情慾。倍於男子。慾心未遂。鬱氣日生。殊不知氣有餘便是火。火因情慾而生。慾因火熾而盛。懷慕不得。則悲傷。悲傷則心動。心動則宗筋感而液道通。雷火一動。龍火奮起。二火相煽。不得真陰灌注。則元液爲鬱火逼迫。而淫液自下。所謂白淫者此也。其形與白帶相似。但帶下膩白稠粘。此則渾濁滑潤。或一時放下白水。爲少異耳。始則經水不調。繼則癆瘵纏綿。調治之法。以加味逍遙散爲主。若在室女。父母須知。

女科指南集卷二

古越王慎軒鑒定

申江戴烈武承氏著

古越王景賢校正

廣嗣門

求子須蓄男精論

夫不孕之故。世人大多責于女血之不調。然豈止于女血哉。良由于男精之不充耳。蓋孕之所成。精之所結也。精之所依。神之所守也。思慮過度。則心馳于外而神傷。房勞無節。則腎耗於內而精竭。二臟爲一身樞紐。心腎皆空。其何以保天和而求嗣哉。且心與腎水火也。腎與命門相依也。命門之火。隨心火而動。君火一動。相火從之。書曰。相火動。搖精出。命門。非精之出于命門也。蓋腎爲命門之火。搏激而精出耳。此時慾火一動。精卽離宮。外雖強閉不洩。然而真精數點。已隨陽痿而溢出。其離宮之精。不爲潛消。卽爲洩白。由是而精液漸涸矣。此精從思慮而傷者也。假令禦女無度。耗散更甚。何也。蓋一身之精神有限。交接之施洩無窮。以有限之精。抵無涯之慾。其爲竭絕也何如。始也濃厚。繼以如水。初或火熾。終必精寒。如是而雖欲孕之。亦烏得而孕之。是故求嗣之要。必本保腎寡慾爲先。保腎者。開其源也。寡慾者。節

其流也。源流交養。精自充而嗣可得矣。

保腎種玉丹

熟地 製首烏 蓮肉 沙苑蒺藜各八兩 萸肉 杜仲

枸杞 牛膝 兔絲子 芡實各四兩 人參 天冬

茯苓 淫羊藿各二兩

腎熱加人中白元武膠 腎寒加玉桂鹿茸膏 右共爲末蜜丸服或酒或淡鹽湯服

求子須調女血論

書曰。婦人平和。則樂有子。平則樂陽不乖。和則氣血不爭。不乖不爭。百脈舒暢。榮衛流行。生化之源足矣。亦何不孕之有。惟寒熱失宜。虛實不當。清者交而爲濁。行者遏而反止。擾亂妄動。失其常度。諸症從此而生。嗣育因之而絕。求子者。可以不調經爲要哉。調之之法。莫若損其太過。益其不及。挽之歸於中正而無偏。更能比義爲體。圓轉爲用。治之盡其源流而無弊無餘。庶乎得其要領也。治法詳於調經門下。然恐猶未盡。故復立調經種玉丹於後。

調經種玉丹

熟地 當歸 白芍 川芎 茯苓 廣皮

丹皮 丹參 香附 延胡 蘇梗

右水煎。空心服。渣再煎。臨臥服。經行之日。服一日一帖。服至經止卽已。

原始論

周子太極說曰。五行之生也。各一其性。無極之眞。二五之精。妙合而凝。乾道成男。坤道成女。二氣交感。化生萬物。萬物生生而變化無窮焉。夫生生化化。不外乎陰陽相濟。未濟則生化之源窮矣。人小天地。亦猶是乎。以其一身而言。元氣卽天地之陽。五液卽天地之陰。以其兩體而言。男子應天地之陽。女子應天地之陰。有是陽則生長有源。有是陰則生成有本。是陽之爲陽。非陰不成。陰之爲陰。非陽不就。女子之數七。七少陽也。男子之數八。八少陰也。又可見陰中之陽。陽中之陰矣。男女相感而流通。陰陽交合而兆始。其凝結成孕者。雖不離乎精血。然精血以情慾而媾。精血爲成身之本。情慾在會合之先。朱子所謂稟於有生之初。悟眞篇所謂生身受氣初者是也。大哉乾元。萬物資始。至哉坤元。萬物資生。夫坤爲天。天爲陽。爲動。坤爲地。地爲陰。爲靜。動而生陽。靜而生陰。動極而靜。靜極復動。一動一靜。互爲其根。以見

六陽爲六陰之基。六陽起於一伏。伏本於純坤。精深哉。至道之極。必本於陰陽配合之妙乎。生化之理。必歸於二五交互之奇乎。無窮元奧。不可思議。今雖漫論。未知其然否耳。

胎前門

驗胎法

婦人月水三月不下。有受胎居經之殊。其候難以測識。然而成中形外。有必露其朕兆者。蓋居者止也。安也。處也。謂居止安處而不動也。其候起居如故。飲食如常。惟右脈浮大。左脈反弱。而外此別無他症。得安居之象。故曰居經。受胎之狀。其人並無寒熱。但胸膈不寬。飲食少思。時或作渴。惡食擇食。時作轉筋。或喜酸味。或嘔吐時舉。此皆有孕之形也。外有衄血一症。亦受胎之象。但衄時噫而動者。則爲非胎。不可爲倒經所誤。易曰。乾道成男。坤道成女。夫乾坤陰陽之性情也。左右陰陽之道路也。男女陰陽之儀象也。精之泄。陽之施也。血能攝。陰之化也。陰陽交媾。胎孕乃凝。胎所居者曰子宮。一系在下。上有兩歧。一達於左。一達於右。受氣於左子宮者。男子之祥也。受氣於右子宮者。女子之祥也。更參之脈息。自然百不爽一矣。

探胎法

居經受胎。介於疑似之間。用川芎一兩。當歸七錢爲末。作二服。艾湯調下。三時後。覺臍腹微痛。胎動頻仍。是有胎也。動止卽愈。非胎則不動。所滯惡血自下也。不驗。再煎紅花湯服。又牙皂去皮。生甘草各一錢。黃連五分。共爲末。作一服。溫酒調下。有胎則吐。無胎則不吐。

保胎八要

一受胎後。不可看戲及鬼怪形象。恐外象而內感也。

二受胎後。最戒暴怒。蓋怒傷氣血。多致動胎故也。

一受胎後。多不可登高上梯。恐顛躓有損故也。

一受胎後。不可伸手高處取物。恐觸胎而子鳴腹中也。

一受胎後。時至五月。常要緊束其身。勿令胎放。

一受胎後。切戒恣慾行房。蓋交媾之時。相火亂動。禍若速者。傷損任脈而胎漏。遲則精血停

蓄。必致胎衣太厚而難產。

一受胎後。最戒安逸。蓋婦人懷胎。血以養之。氣以護之。宜時常行動。令血氣周流。則胞胎活動。若久坐久臥。則血凝氣滯而難產。常見田家苦勞之婦。其產甚易。此其證也。

一受胎後。奉養不可太厚。蓋胎之肥瘦。氣通於母。恣食厚味。必致胎肥難產。常見糟糠之婦。容易生產。可證也。

孕婦忌食輯

食燒酒令子驚癩。食雀腦令子雀目。食楊梅李果令子多瘡疥。食椒薑辛辣之物主損胎。食無鱗魚及蝦主難產。食鮮魚共田鷄食令子瘖啞。食蟹令子橫生。食生薑令子多指。食豆醬與麩香食則墮胎。食蟹令子短頭及損胎。食雀肉令子淫亂。食雞子及乾鯉魚令子多瘡。食雀肉合豆醬令子滿面多黑點。食雞肉同糯米食令子生寸白蟲。食雞子鴨子同桑椹食令子倒生。食兔肉令子缺唇。食犬肉令子無聲。食驢馬肉令難產。食牛羊肉令子多病。

孕婦忌藥歌。歌中附子、丹皮、肉桂、槐花、半夏、木通、乾薑、桃仁、茅根。此九味有病宜用者。亦常用之。內經所謂有故無殞。亦無殞也。

蛭蟹水蛭及蟲蟲。烏頭附子配天雄。野葛水銀并巴豆。牛膝薏苡與蜈蚣。三稜芫花代赭礬。大戟蛇蛻黃雌雄。牙硝芒硝丹皮桂。槐花牽牛皂角同。半夏南星與通草。瞿麥乾薑桃仁通。

礪砂乾漆蟹爪甲。地膽茅根胡粉同。

胎教 附轉女爲男

夫妙合而凝之時。正形生神發之初。感於正則善。感於邪則惡。自然之理也。是故胎教之法。不可謂之迂而不信。烈女傳曰。古者婦人妊子。寢不側。坐不邊。立不跛。不食邪味。割不正不食。席不正不坐。目不視邪色。耳不聽淫聲。夜則令警誦詩。道正事。如此則生子形容端正。才過人矣。若夫紫宮玉女有胎化之法。可轉女爲男者。皆虛而感。感而變也。欲生男宜佩弦弧。執弓矢。欲生女宜弄珠璣。佩韋環。欲子美色。宜佩白玉。欲子賢能。宜看詩書。是外象而內感。然其理有當然者。食牡雞取陽精之全於天產也。帶雄黃取陽精之全於地產也。藉斧斤取剛武之見於人事也。氣類潛通。密移造化。則陽可以勝陰。而變女爲男矣。觀於蠶之作繭。蠶婦衣黃則黃。衣白則白。有束無束亦然。物類且然。况人之同類乎。

逐月將息論

治病之要。最貴圓通。圓通之法。莫善於見症治症。胎前見諸症。下文詳之矣。茲將逐月將息之說。不議見症若何。而竟立方。不幾入於執迷之咎乎。不知此時爲無病者設之也。夫既不

病。何藥之有。良以豪富之家。未病常思服藥。以不病而欲服藥。令不預立之而可乎。故所取者。皆和平之劑。非謂胎在某月。安胎必用某藥也。用者其審諸。

妊娠一月名胚胎。飲食宜精美。食大麥。無食酸辛。此月足厥陰肝養之。肝主筋血。母爲過勞之事。寢必安靜。無令恐懼。安胎之藥。如歸芍苓朮條芩麥冬人參甘草之屬。

妊娠二月爲膏胎。無食酸辛之物。居必靜處。弗勞百節。謂始藏胎也。足少陽膽經養之。膽主精。是時兒精成胞裏。無使搖動。勿令驚恐。以丹參人參歸艾膠朮熟地炙草之類調之。

妊娠三月名始胎。其時未有定儀。見物而化。所以有轉女爲男之說也。是月手厥陰心包絡養之。此經內屬於心。無悲哀思慮驚恐。胎元調理。前方加茯苓麥冬。

妊娠四月。受水精以成血脈。其食稻粳。其羹魚鷹。是謂養血氣。以通耳目。而行經絡。乃手少陽三焦養之。其時兒藏府順成。當靜形體。和心志。節飲食。安胎之藥。如條芩芍朮歸川續斷香附甘草之屬。

妊娠五月。始受火精以成其氣。臥必晏起。深其居處。厚其衣裳。常朝日光。以避寒殃。其食稻麥。和以溫煖。調以五味。是月足太陰脾經養之。其時兒四肢皆成。無大飢。無甚飽。無食乾燥。

無食炙熱。無大勞倦。蓋五月以肌肉初生也。四君子湯加芎歸條芩大棗之類。

妊娠六月。始受金精以成筋。身欲微勞。母得靜處。出遊於外。數觀走犬走馬。宜食鷹虎之肉。是謂變腠理以養其力。是月足陽明胃經養之。胃主口唇。六月之時。兒口唇皆成。宜調五味。食甘美。毋太飽。安胎如參朮生地條芩芍藥甘草之類。

妊娠七月。診其脈強盛實大者吉。沉細者凶。受水精以成其骨。勞身搖肢。無使定止。動作屈伸。以運血氣。節飲食。避寒暑。食粳稻。以密腠理。是謂養骨而堅齒。此月手太陰肺經養之。肺主皮毛。其時兒皮毛已成。無大言。無號哭。無薄衣。無沐浴。無寒飲。保胎之藥。生脈散加黃耆紫苑甘草。

妊娠八月。診其脈實大牢弦緊者吉。沉細者凶。始受土精以成膚。和心靜息。無使氣極。是謂周密腠理。光澤顏色。此月手陽明大腸養之。胎兒九竅皆成。無食燥物。無輒失食。無忍大氣。縮砂丸。

縮砂 陳皮各三兩 白朮二兩 茯苓一兩 條芩五錢

共爲末。米糊丸。每服二錢。

妊娠九月。五藏六腑筋骨皮毛。莫不畢備。飲醴食甘。緩帶待時。是月足少陰腎經養之。其時兒脈續縷皆成。無處濕冷。無著炙衣。稍服歸地苓朮麥冬之屬。

妊娠十月。五藏六腑俱通。納天地於丹田。是時關節人神皆備。但待時而生。肥壯人服枳甘散。枳殼四兩 甘草二兩 末服

凡婦人一有身孕。用炒黑砂仁末。或空心時。或日中泡湯常服。生兒必清秀。

惡阻屬氣血積聚攻胃

血之運動本乎氣。氣行則血行。氣滯則血滯。然氣之行止亦隨乎血。血流則氣通。血結則氣鬱。凝血成胎。則氣亦滯而不運矣。所謂惡阻者。惡血阻其清氣也。阻則內鬱。鬱則中焦不得宣暢。以致痞塞不快。噫氣攻衝。出入升降之道。妨礙窒塞。脾胃氣鬱而不伸越。連至脾家磨蕩之機運。所以飲食少思而嘔逆也。治法惟用和胃開鬱順氣之藥。使胃氣調達。則內伏之結氣。自然舒達矣。

廣皮 蘇梗 烏藥 香附 條芩 白芍
當歸 甘菊 枳殼 烏梅 加砂仁 寒氣甚者加蒼朮 藿香 艾葉

胃虛者加白朮茯苓。

惡阻屬壯火衝胃

惡阻者。惡心阻其飲食而嘔逆也。其經屬胃。其原屬火。蓋陽明爲諸陽之總。陽明之外。無大熱也。體本火局而更爲壯火奔騰。則胸膈擾亂。而食少善吐矣。內經所謂諸逆衝上。皆屬于火是也。驗其六脈洪數。形神煩悶。口燥咽乾等症。胃經煩熱了然。治法以寬氣清熱爲主。寬氣如蘇梗、腹皮、烏梅、枳殼。清熱如芩、連、山梔、乾葛。火盛者加石膏。氣逆者配烏藥。務祈胃熱清而壯火退斯已矣。

子煩屬熱氣衝心

心屬火象。離爲丁火。其性易動。然下交於腎。得坎水相濟而成爲火。故爲君火。當寂無所觸。其何勿寧哉。惟是邪陽烈熱。衝突其經。以火濟火。二火相併。體自煩擾而不寧矣。乃謂之子煩者。以其受胎後。熱氣衝心。煩悶撩亂。故曰子煩。非子在腹中煩也。其症脣紅口燥。所遇皆憎。躁亂咆哮。有欲靜不能之意。以瀉心湯主之。

瀉心湯

黃連 犀角 生地 知母 山梔 蘇梗
烏梅 甘草

子煩發渴屬壯火鑠金

咽喉乾燥則渴。然乾與燥有虛實之分。乾爲虛而燥爲實。均屬肺病。以咽喉屬肺。肺屬金。金生水而畏火。金虛則不能需下降之令。猶之白露不降。水乏其本。華池乾涸。而渴從之矣。其症稍飲卽止。俄頃又乾。喜熱而惡冷。聲音低小。脈來微弱者。此係津液本少。而虛火乘之也。以補液湯生其津液。而渴自止。若百杯未足。須臾又燥。喜冷而惡熱。聲非啞卽厲。脈來洪數者。金本不虛。總爲壯火熾盛。虛燄如爐。生水之源爲邪火灼竭而然也。以清金解渴湯。制其烈火。而渴自解。虛與實之別。辨有未確。更合於神情症狀而參考之。自無不得其真矣。

補液湯

人參 麥冬 五味 訶子 桔梗 甘草

清金解渴湯

犀角 川連 黃芩 山梔 花粉 石膏

葛根 烏梅 甘草

子懸屬氣滯舉胎上湊

妊娠懷胎近上胸膈。氣逆腹滿痞悶者。名曰子懸。此因濁氣舉胎上湊也。蓋人身之氣周流不息。如環無端。若七情交攻。五志兼發。則清者變而爲濁。濁則失於太過。丹溪云。氣有餘便是火。火性炎上。任其縱橫而無制。則胎爲其所載而上逼矣。治宜疎氣降火爲主。疏氣如蘇梗、腹皮、枳殼、烏梅、香附、廣皮之屬。降火如條芩、山梔、甘菊、童便之類。然歸芍丹參爲安胎之要藥。得毋不計品類之不齊。若白朮之膩。川芎之升提。不得概爲胎前宜養血而必用也。臨月上逼嘔吐欲死者。頻用熱童便下。又方 烏梅七個。生薑二片。煎湯下。

子滿屬脾虛不能制水

脾爲中土。土無專氣。無定位。惟不專。故能統諸氣之總。惟不定。乃能定諸經之位。土得其強。則精神內固而外旺。水受其制而體平。中氣虧損。則翕受之樞失其常。貫輪之軸虛其職。不惟無以制水。而水氣反能侮土。濕氣淫溢。外攻形體。內注胞胎。肌肉反爲侵漬。則遍體浮腫有自來矣。此子滿之所由成也。是水不利。則胞爲水漬。漬而胎元壞。設或過利。則胎液涸而

運動艱。總宜人參、白朮、廣皮、茯苓、以澄其源。紫蘇、腹皮、澤瀉、車前、以潔其流。小便不利者。滑石、葵子、以導赤除煩。濕氣上溢。侵肺作喘者。減參朮加蘇子、葶藶、枳殼。久嗽而虛者。參蘇飲最爲切當。兼外感者。去苓朮人參。加疎散之藥。俟表邪盡徹。而後培土益元。庶不致誤。

子氣屬脾虛濕氣

四肢屬脾。脾性喜燥惡濕。其職專司磨盪。土氣虛乏。則失其運化之令。而濕氣內鬱。無由發洩。以致水穀之氣流於肌肉。注於四肢。而子氣之症作矣。其病與男子相似。而更名子氣者。以其軍在下部之異也。症狀兩足浮腫。漸至腿膝。甚則足趾出水。總屬脾虛有濕所致。以參苓白朮散治之。待至分娩之後。自是潛消矣。

參苓白朮散

人參 赤苓 白苓 車前 白朮 澤瀉

建蓮肉

胎痛屬肝腎血虛

左之腎。繫胞胎而生肝。肝之藏。爲藏血而養胞胎。一經猶唇齒之邦。兩相輔而兩相需者。若

腎虛則肝無以生。肝虛則胎無以養。兩臟俱空。則胎係乏力而下墜矣。所謂胎痛者。覺胎重墜。小腹微微作痛者是也。其原由於肝腎虧所致。治以補血爲主。佐以升提調和之劑。八珍湯加升麻、元胡索。

妊娠腰痛屬房不謹

腰者。腎之候也。男子以藏精。女子以繫胞。婦人心神恬靜。腎不擾而體自安。胎不傷而孕日長。若慾火動于心。害即應乎腎。以腎爲易洩之藏。故萌而不遂。卽慮其移禍無窮。而况男女俱熾。樂及于縱者乎。既事不謹。火必擾腎。腎傷則胎繫困乏。輕則延月難產。重則經血復下而胎斃矣。其危同于風燭。所以古者有孕。卽居側室。不共夫寢。良有以也。治以參、朮、歸熟地、白芍、阿膠、地榆、續斷、寄生之屬。

妊娠腰痛屬勞力不節

夫胎之繫於腎。猶鐘之懸於梁也。梁折則鐘墜。腎虛則胎下。然腎果何自而虛。以腎主骨。力從骨出。勞力則骨傷。骨傷而腎亦從之。其何以能勝任胞胎之繫乎。所以腰痛屬勞力不節者。最爲胎動之發端也。一則補血壯腎爲主。卽有牽帶。在所可緩。亦不必並衡。以養榮健腎。

湯治之。

四物加參、朮、續斷、枸杞、杜仲、胡桃肉。

妊娠腰痛屬風寒所襲寒濕不散

妊娠腰痛之患。大約屬虛者居多。然有風襲太陽與乎濕氣久客者。均足成腰痛之疾。須以脈症辨之。如脈浮惡風發熱者。風邪也。以潛消飲散之。若天陰久坐而痛。腰重如帶物而冷者。寒濕不散也。以滲濕湯利之。更用太乙膏攤貼。

潛消飲

羌活 前胡 獨活 葛根 蘇葉 薄荷

白芷 黃芩

滲濕湯

蒼朮 赤苓 橘紅 廣皮 防風 川芎

澤瀉

太乙膏

鼠穴土一升。研極細。炒紅。以醋沃之。調成膏。攤布貼患處。

激經屬氣血有餘

婦人之血。未孕下之爲月經。既孕蓄之以養胎。既產積之以爲乳。妊娠而經血復下。其爲漏胎也。無疑矣。乃謂之激經者。何哉。良以人身之血。有盛衰之不同。本體虛弱者。雖經心保護。時慮養血之胎有虧。若壯實之人。雖養血之外。尚有餘血。餘則復溢。所以胎日長而無患也。驗其經來微少。飲食如故。精神如常。六脈和調。絕無漏胎之象。激經之症了然。第是症見於三月以後。故知其爲妊娠也。是症不可以漏胎治之。亦不可以無病目之。治以涼血和血已耳。無容過求也。

生地 白芍 黃芩 蘇梗 丹參 砂仁

甘草 酒製延胡索

胎動胎漏屬衝任氣虛

妊娠下血而腹痛者。胎動也。無腹痛者。胎漏也。胎動胎漏。均屬衝任。衝任雖持平陰陽交合。爲肝腎之用事。然長養生胎。皆坤土所資。蓋陰陽抱則不泄。坤土提防則不漏。若二脈虛弱。

或瘀濁客於衝任。則陽精不能內成。陰血無以外養。其血自復下而不絕矣。如腹痛不已者。陰血自結。與胎阻隔。不能與陽相合之故也。急宜既止且補。以救胎爲主。否則未有不至半產而後已者矣。

安胎飲

八珍湯加黃耆、丹參、杜仲、續斷、寄生、阿膠、酒製延胡索。

赤淋尿血屬小腸膀胱積熱

夫溺時下血而不痛者。爲尿血。澀痛者爲赤淋。皆緣小腸膀胱火熾而起。蓋手太陽爲心之火腑。其火易動。且受盛之官。內屬丙火。與州都爲唇齒之邦。微熱則溲溺不利。甚熱則血自妄行。治宜涼血清火爲主。佐以通調之劑。涼血如生地、丹皮、荊芥。清火如芩、連、滑石、琥珀。通調如童便、澤瀉、車前、淡竹葉。洵湧必佐大黃以奪其勢。庶不致陽邪內擾而攻潰也。

激經胎漏尿血辨

病有實同而名異者。胎動與胎漏是也。有相似而不同者。激經與胎漏尿血是也。相同者不必論矣。相似者。如激經爲血對經期而下。宛如臨經之狀。胎漏則無時而來。尿血從溲而出。

溺時則有不溺則無也。其同中之異爲何如哉。故不憚屢屢存之。以防臨症者之誤認。凡下血暴厲者。其胎必下。若徐徐來者。可服藥止之。

子淋屬心肺移熱於小腸膀胱

書曰。五淋皆屬於熱。熱者動也。動而生陽。故令內熱。熱劇煎熬。則爲淋閉。蓋人之洩溺。雖出膀胱。實由於肺之通調。小腸之分布。陽火亢甚。則上焦失清化之令。而不能下輸於膀胱。心火熾盛。則移熱於小腸。而下焦熱結。總係水被火炙。錯爍將竭之候也。其症時時欲便。及至其器。則涓滴難解。若欲已之。又淋漓不斷。病名爲淋者。其原蓋出於此。男子常有是病。孕婦患之。故曰子淋。宜用加味導赤散治之。若從薛氏腎氣丸之法。猶之火上加油。禍不旋踵矣。

加味導赤散

生地 淡竹葉 木通 黃連 黃芩 滑石
車前 澤瀉 杏仁 甘草稍 重加大黃、琥珀、童便。

轉胞屬火逼胎衣下墜

腎與膀胱相爲表裏。腎繫胞胎。膀胱主溺。其道相近。胎之所畏者火也。火灼胎繫。則弱不能

勝。或爲偏側。或爲下墜。壓著膀胱。小便自閉。名曰轉胞。夫膀胱。水府也。一身之本。得此而氣化出入。水道阻塞。則外水應入而無門。內水應出而沒路。脹滿懸結。其爲苦疾也何如。以淡鹽湯探吐之。使胎氣上達。遂服快溺煎以利溲除煩。則熱自退而胎自安矣。

快溺煎

杏仁 滑石 葵子各二兩 黃連一錢 車前四錢

升麻二錢 甘草五分

轉胎法 甘遂末水調敷臍下。內服甘草湯。待藥力至臍。二藥相反。胎必自轉。小便來

如泉湧

轉胞屬胎元虛弱下墜

轉胞者。胎下墜而小便不通也。小便癰閉。緣於火者。十居八九。本於虛者。亦有二三。如胎賴血而能養。血賴氣而能充。氣血旺足。胎自能舉。若榮虛則胎無以養。衛虛則氣不能上載。因而下壓膀胱。溺自不利。其人必面無華色。精神倦怠。飲食減少。六脈微弱。氣虛水隔之症無疑。治宜內服補中益氣湯。外用托胎法。

胎法 令婦人仰臥於櫬上將足後櫬頭漸漸抬高如是片時胎自舉而湧出如注
子瘡屬胎氣充實

心之氣出於肺而爲聲。其竅若管籥焉。妊娠九月不語者。名曰子瘡。緣胎氣太實。心竅爲其迷閉而然。蓋心爲神明之官。迷則氣自不清。閉其聲自不出矣。經云。重身九月而瘡。胎之絡脈絕也。當十月復。子和以不相接解絕字。玄臺以阻絕不通解絕字。二說卽迷閉之謂也。但經文及百家之書。皆言胞繫於腎。腎脈貫舌本。故不能言。不知此特言出聲之道路已耳。未及不語之由也。予獨究乎胎氣太實者。緣分娩之後。胎氣自散。心散無所阻塞。故能發言。不然何以當十月復也。若曰人之聲音。出於喉嚨。發於舌本。九月胎氣。胎大阻腎上行之經。若據此說。則凡妊娠者。皆當瘡矣。奈何竟罕見耶。書言皆爲不詳。素問雖云不必治。然服瘦胎撻氣散。亦可奏捷。

瘦胎撻氣散

杏仁 菖蒲 枳實 元參 桔梗 甘草

子癩屬賊風所中

風之爲病。善行而數變。入於肌膚。則頑麻不仁。入於筋骨。則強直攣急。更有入裏而險阻者。其症必痰壅氣滯。經絡痞塞矣。如妊娠口噤背強。或眩暈。或冷麻。或冒悶。不知人。甚則角弓反張。須臾自醒。良久復作者。名曰子癰。又名子冒。其症屬風。其因有三。曰火。曰痰。曰氣。三者皆能呼召風來故也。治宜搜風湯。牛黃丸之類。第世之治風者。皆泥治風先治血。血盈風自滅之言。而更謂牛黃非入臟者不可用。不知風爲六淫之首。其爲病最可慮者。理固宜防。然須防於未病之先。預防之法。自宜養血。血足則風不能入矣。而曰治風。風其已入而爲病矣。輕則疎散。重必攻逐。若以養血爲先。地黃膩膈。白芍收斂。川芎升提。惟當歸庶幾活動。舍四物之外。壯血而功倍者不少。抑知其膩膈。更何如耶。縱養血在所不免。必先闢補之地。而令其能受。方爲合法。若云牛黃非入臟者不可用。更爲可哂。牛黃之性。直入筋骨。風邪既入於骨。尙能搜討而出。況彼入腑入經者。是藥治之裕如矣。豈有引風入髓之理耶。昏昏之論。往往如此。而執迷看書者。又爲比比。安得不力爲之辨哉。幸高明者裁之。

搜風湯

廣皮 沉香 靈仙 獨活 膽星製 天麻

杏仁 瓜 萸 貝母 蘇梗 枳殼 丹參

全當歸 茯苓 沖薑汁竹瀝溫服。火盛者加黃連、鮮首烏。

子嗽屬風火乘金

肺爲諸藏之華蓋。百脈之朝宗。十二經絡之領袖。外合皮毛。內通五臟。而聲出於咽喉。土爲金之母。火爲金之讎。孕婦起居不慎。風寒有隙可乘。卽爲不速之客。久則寒變爲熱。風化爲火。入於肺金。發爲子嗽。肺爲氣之主。病於熱邪。氣壅塞滯。兼之火助。咽乾鼻燥。甚則喘急煩悶。而不得睡臥矣。此皆火邪刑金之症也。以保肺丸清金湯治之自愈。

清金湯

桑皮 枳殼 茯苓 杏仁 蘇子 前胡

瓜 萸 花粉 重加麻黃、石膏。喘加葶藶、枇杷葉。

子嗽屬肺冷金寒

夫肺爲嬌藏。畏熱畏寒。烈火刑金固嗽。肺冷金寒亦嗽。總與風火發症之患。大相徑庭。其候嗽則聲輕而不猛。渴則杯飲而卽潤。面白唇黑。精神懶倦。六脈微弱。甚則全無。皆緣元氣本

虛。津液不得轉運於喉間而然也。是症不得與客感表邪混同立論。宜以沉養溫補。斯爲合法。亦必參合望聞問切。庶不爲似是所誤。若以實者爲虛。而概用補養酸收之劑。未有不至北路南轅。東行西向之弊也矣。

保金湯

人參 麥冬 五味 玉竹 天冬 百合

黃耆 茯苓 沙參 製首烏 發渴加訶子

子瘧屬三因之邪

瘧有三因。外因。內因。不內外因。外因者。風寒暑濕是也。內因者。憂思飲食驚恐鬱結是也。不內外因者。合內外而致之者也。受病不一。瘧症多端。總緣以氣爲邪阻。氣阻則隧道不清而痰生。痰與邪相併而成瘧矣。所謂無痰不成瘧也。妊娠患之。寒戰振慄。熱氣熏蒸。最易動胎。必速去其邪。繼卽安胎醒脾。庶無恙也。治宜乾葛前胡防風以達其閉。生薑厚朴半夏以治其寒。柴胡黃芩荊芥以清其熱。寒勝於熱者。加蒼朮倍半夏。熱勝於寒者。加青蒿倍黃芩。無汗倍乾薑。汁多加白朮。其餘廣皮茯苓滑石扁豆木通甘草皆可選用。據方書云。百病先以

安胎爲主。第邪不去。胎亦未必安。故安胎莫先於去邪。去邪卽所以安胎也。若徒用歸芎白朮等味。以安胎養血。吾恐閉城門而欲其盜之出也難矣。

妊娠目暗屬胎熱

夫五藏之精華。會聚於目。目之位。肝主之。書曰。肝有病則目疾多。妊娠將至臨月。兩目失明。不見燈火。頭暈痛。腮頰腫。不能轉項。此肝經熱毒上攻故也。名曰胎熱目暗。治以羌活、甘菊、荆芥、木通、黃芩、山梔、薄荷、元參、羚羊之類。重則撥雲散。

妊娠悲傷屬臟燥

肺屬金象。兌爲辛金。其用旺於秋。其聲主於哭。爲輕清之臟。輸化之官。治節出焉。娠無故悲泣。慘感淚下。如有鬼憑之狀者。肺燥故也。書曰。金主悲傷。然能燦金者火也。易曰。燥萬物者。莫燠於火。夫金爲陰之主。爲水之源。而受燥氣。則寒水生化之源。竭絕於上。而不能灌溉胎元。由是本聲透露。而悲哀之症作矣。宜治甘寒溫潤爲主。以甘能生血。寒能生熱。陰陽滋而火殺。液得潤而燥除。自然源泉下降。精血上榮而愈矣。

加味甘草小麥湯

甘草 大棗 小麥 生地 麥冬 黃連

乳泣腹啼

夫未產前乳汁先下者。名曰乳泣。既產之後。其乳必寡。生子十死其六。不必治。七八月間腹中有兒啼聲者爲腹啼。必登高伸手。兒口中臍帶疔落塊脫出。故有聲也。令婦曲腰在地拾物。使兒仍得含吞入口卽止。又方取鼠穴土。煎湯服半茶杯更效。

傷胎斃胎辨症用藥

傷者。胎未死而已傷也。斃者。胎從傷而致死者。傷宜安而死宜下。兩症相懸。猶之陸地不見舟楫。江河不見車馬者。然傷胎之症不一。有緣於跌仆而傷者。其候腰腹疼痛。下血無時。有痛不可忍之狀。以芎歸各五錢。砂仁蘇梗錢許。水酒煎服。全者安而損者下矣。或用丹參二兩。煎就。沖熱童便服。亦有安全下胎之功。若毒藥傷胎之見症。牙關緊急。口不能言。肚腹絞痛。兩手強直握拳。自汗身熱。以生甘草三錢。黑豆、菘豆各二合。淡竹葉二兩。煎就。和上號潔白糖二兩溫服。更頻飲熱童便自安。或用白扁豆二兩。生去皮爲末。用新汲水調下卽效。然果何以驗其爲傷與斃耶。其道一以貫之。面赤舌青者兒死也。面青舌赤吐沫者母死也。唇

舌俱青兩邊沫出者。子母俱不救。面以候母。舌以候子。百不爽一。更參之於指甲青黑。口中穢氣噴人。胸腹悶脹等症。死胎之症無逃矣。死胎宜逐下爲佳。然亦當分症用治焉。如妊娠胎漏子死者。用丹參二兩。同好酒煎就。用白蜜麻油各半鍾。和勻徐服。兼進回生丹二三丸。卽下。跌仆致死者。佛手散合失笑散。加鹿角屑、桂心、牛膝、蘇梗、腹皮、滑石。水酒各半煎服。得回生丹更效。熱急者大黃亦可選用。若因傷寒熱病痢毒痧脹霍亂等症。胎受臬邪攻擊而病斃者。以平胃散加朴硝、大黃、牛膝、滑石。急性子下之。更於本病間衡其輕重緩急而加減焉。尤得圓通之妙。既下之後。卽從其本病虛者補之。瘀者去之。熱者清之。庶乎無虛虛實實之弊也。母論跌仆熱病致胎死。凡指甲青者。卽可用硝黃平胃湯。

半產屬胎元不固熱病纏綿

半產與正產。症異而治同。症異者。正產如瓜熟蒂自脫。半產如生斷其根。治同者。均宜去瘀血生新血也。半產之症。其原有二。一屬於虛。一屬於實。虛者衝任氣虛。不能滋養胎元。胎氣不固。所以未足月而產。如梁折鐘墜者然。凡胎動胎漏。勞力不節者。多致此症。以生榮去瘀湯主之。實者邪氣實也。邪實則正氣不能自主。胎元爲其桎梏。甚則追逐而下。凡傷寒溫瘧

瘦痢乾霍亂等症。最易小產。宜從其本病。而佐以消瘀湯。鼻熱未退。而惡露停阻。則芩連、石膏、滑石之劑。不可執產後不宜寒而棄之也。蓋寒凝用薑桂。熱結佐芩連。大熱未和。惡露不有凝滯者乎。總症治與正產相同。若昏暈惡露諸症。尤爲一理。言有未盡者。皆當於正產後求之。寒凝熱結。見正產惡露條下。

生榮去瘀湯

丹參 川芎 當歸 牛膝 益母 赤芍

桃仁 山楂 香附 延胡 枳殼

導瘀湯

桃仁 赤芍 歸尾 益母 澤蘭 山楂

香附 延胡 紅花 青皮

墮產半產胎漏辨

妊娠下血而未產者曰漏胎。未足月而胎已下者曰半產。漏胎宜補血。半產宜去瘀。判若駝馬。胎下面已成形者曰半產。未成形者曰墮胎。墮胎宜去瘀和榮。與半產少異。方書不爲詳

辨。後學未能悉知。故備論之。

妊娠痢疾總論

痢之一症。由於傷暑而致。然暑有不同。靜而得之者爲暑。其發尙淺。動而得之者爲熱。致病尤重。傷於暑者。其病在氣。其痢白。傷於熱者。其病在血。其痢赤。暑熱俱傷者紅白相兼。白而若凝脂魚腦者。暑濕毒之最盛者也。紅而若屋漏醃魚水者。暑熱毒之最盛者也。症雖多端。不外乎暑熱之毒。胎前構此惡症。尤爲可虞。輕則延纏日月。重則兩命殘生。一以祛邪爲主。安胎二字。可以不問。何也。蓋胎本安者也。有邪觸之。則胎不安。如人之手足。本能運動者也。將繩繫之。則不能運動。欲手足之能步能握。必先解其繩。欲胎之安靜無虞。必先去其邪。邪得一分清。胎得一分恬靜。設專顧其胎而後其症。將邪何祛。邪不祛而胎愈困矣。如謂胎前不堪重劑。則胎前不當遣此重症矣。病果因人而受否耶。抑因其胎而邪能自退否耶。從來有病則病受。此不易之理也。故安胎之法。有二因。母病而致胎不安。但治母病。其胎自安。因胎不安而致母病者。安胎而母自愈。此說原可開千古之迷論。第世之醫者。膠執百病先安胎之說。而不究安胎先去病之理。輒謂不愆不忘。率由舊章之謂何。而可妄立偏見耶。嗚

呼。自不明理。反謂圓通。如此執滯。可痛哉。可哀哉。

凡紅痢。或躁亂猖狂。或腥臭逼人。或愁楚不堪。汗洩如蒸。毒滯於下。晝夜無度。後重努力而卒不能解。痛若刀刮。小便癃閉。毒竄於上口。噤不食胸。膈迷悶口。膩如脂等症。皆由痢毒內擾故也。以滌邪攻毒飲主之。

滌邪攻毒飲

大黃 檳榔 莪朮 滑石 荊芥 澤瀉

葛根 前胡 黃連 赤芍 木通

加絲瓜葉二張 白豆葉五張

凡紅痢。或身體壯熱。或脈來洪數。或不耐衣被。眠坐思涼。熱毒上行。唇紅口燥。舌乾如炙。口渴喜冷。邪熱下注。肛門燥痛。按之熱氣如射。小水如油。種種皆火熱毒燔灼故也。以除煩清熱飲主之。

除煩清熱飲

黃連 黃芩 大黃 石膏 木通 滑石

荆芥 乾葛 澤瀉 枳殼 花粉 加燈草二十根
凡紅痢。或凝結成塊。或濃厚如膏。或有水如醃魚屋漏。皆瘀毒也。此因熱毒重傷血分。以致凝結乃爾。雖傍流如血水。而堅凝之毒。猶固閉也。以破瘀導滯飲主之。

破瘀導滯飲

桃仁 大黃 三稜 荆芥 木通 黃連

生地 滑石 青皮 赤芍藥 玄明粉 加藕節燈草

凡白痢。有凝結如脂。欲解難解。但有痢而無糞。小洩短縮。腹有痛或不痛。無一切燥熱之症者。以導壅理氣湯主之。

導壅理氣湯

陳皮 厚朴 木香 枳實 黃連 吳茱萸製

茯苓 澤瀉 防風 赤芍 山查

凡白痢。如魚腦色。水多糞少。小便不利。更有溼蒸氣。後重腹痛。或有畏風。或腹不痛。以勝濕分理湯主之。

勝溼分理湯

蒼朮 陳皮 厚朴 防風 茵陳 茯苓

檳榔 澤瀉 豬苓 木香 山查 加生薑

凡血痢。去血過多。臉色淡紅。或淡血水。或有腹痛。皆血虛也。從前一切燥熱之症。十減有九。以養榮斂血湯主之。

養榮斂血湯

當歸 白芍 阿膠 槐花 生地 川芎

黃連 澤瀉 山查 扁豆 柴胡 加烏梅藕節

凡痢已久。一切暴厲之症。十減其八。神思倦怠。語重聲輕。或有微汗。脈按無力。飲食少進。或後重痢少而糞不來。以健脾固本湯主之。

健脾固本湯

人參 白朮 茯苓 甘草 陳皮 木香

車前子 小柴胡

夫胎前痢疾。治之不早。卽爲半產。前論症七條。措置七方。皆爲礙胎之藥。實可收安胎之功。余年來蒐討之苦心。盡施於此。對病處方。法無不中。方書並無此論。深惜女科之無善本。故備論以發前人之未盡。幸高明者。勿以爲妄誕可也。

胎前傷寒總論

夫妊娠傷寒。最易動胎。然胎非自動也。良以患傷寒而動之耳。欲令胎安。莫先靖累。夫去病非安胎也。然因病而胎不安者。病去而胎自安矣。傷寒有表症裏症。有半表半裏之症。表症宜散。裏症宜攻。半表半裏者宜和。據百病先安胎之說。和解清熱。胎前之宜事。發表之法。已屬權變。至於攻裏之方。雖爲胎前所大忌。若裏症熾盛。而棄承氣之類。懷娠之軀。已屬幻化矣。尙有身外之胎否耶。總之病輕而勢緩者。以安胎爲主。病重而勢急者。以治病爲先。治病正所以安胎也。昧焉從事者。固不足以爲司命。卽泥古據今者。亦未可云神聖也。寄死生者。可不注意於斯哉。

傷寒表症。始於足太陽經。太陽之症。頭疼身熱。骨節煩疼。是經有兩症。有傷於風者。有傷於寒者。風性動盪爲陽。人身氣爲衛而亦陽也。風故傷衛。寒性凝著爲陰。人身血爲榮亦陰也。

寒故傷榮。雖有所分。症皆屬表。古方以麻黃湯治寒。桂枝湯治風。又以沖和湯同治兩症。然猶未足爲盡善也。總不若以潛消飲。最爲良法。

潛消飲

羌活 防風 川芎 前胡 葛根 黃芩

蘇葉 無汗而寒重者。加麻黃。去黃芩。汗多而熱甚者。去葛根。加石膏。

傷寒半表半裏之症。邪在中也。其經屬少陽。其症頭角痛而目眩。胸脅痛而耳聾。寒熱往來。口苦舌乾。治宜和解爲主。用加減小柴胡湯

柴胡 黃芩 半夏 甘草 枳殼 青皮

連翹 熱勢盛者。用三陽通解散。

傷寒裏症。邪入陽明也。陽明之症。揚衣棄被。不惡寒。反惡熱。有叫喊狂煩。有大渴不已。有唇焦舌黑。有揚手擲足。有大便閉結。小便癢閉。百端熱症。靡不由此而出。以加味承氣湯主之

加味承氣湯

大黃 黃芩 前胡 枳實 甘草 柴胡

黃連

傷寒熱邪傳入陽明。是行盡三陽氣分矣。其症下之。或燥糞。或積垢。得以淨盡。則無傳矣。否則有失下。有誤下。有下之不盡。有仍雄據。有尙留連三陰。有隙可乘者。因隙而入矣。其症譫語發渴。舌起黑胎。大便閉結。或臍腹硬痛。小便短赤。溺出如沸。三陰爲熱邪所入。其固有隙可乘。然以熱投虛。假令邪輕而虛不甚者。易治。假令熱邪猖獗而本藏又值虛極者。斯爲難療之症矣。人卽虛甚。邪不驅逐。必致內攻。何能得救。以加味大承氣湯下之。

加味大承氣湯

黃芩 黃連 石膏 犀角 大黃 枳實

厚朴 甘草

凡傷寒至陽明之經。熱毒卽暴。觸動胎元。便爲小產。是故熱勢猛厲者。藥內卽加黃連犀角。外治以滑石爲末。井水調敷臍下。頻易之。

夫傷寒症有六經傳變不定。其症繁多。故方書每多特立一門。仲景先生之傷寒論。節菴陶君之六書。屬均可選。外此之論傷寒者。惟吾德對先生之一見。能醫之第三集。議論精詳。無

懈可擊。用藥切當。圓轉無滯。可稱傷寒科之獨步。余論傷寒。疑爲太簡。然胎前足致小產者。莫如是症。使合乎議論。投以藥石。庶可子母無恙。卽變症百出。由此而變化以用之。亦可泛應。第言不能盡意。欲洞澈傷寒者。宜覓一見能醫讀之。

胎前霍亂痧脹

夫安胎先去病。前已詳論於傷寒痢疾矣。乃霍亂痧脹二症。尤宜速去其邪者。霍亂之由。緣三焦爲暑熱所困。陰陽不分。水火不交。熱毒揮霍。亂於三焦。名曰霍亂。以見水不上升。以濟火。邪在上焦。以致吐。火不下降。以濟水。邪在下焦。以致瀉。然尤得其上吐下瀉。邪庶發越。隨服清暑解毒湯卽愈。若乾霍亂者。上不得吐。下不得瀉。肚腹絞痛。以手按之。則腹中軟弱。病人自覺脹滿難忍。是症胎可立下。命可立傷。治之不早。兩命同歸冥路。然大敵當前。非敢卒可勝。以拾將湯治之。

拾將湯

大黃 黃連 滑石 木通 降真香 赤芍
廣皮 細辛 葛根 甘草

清暑解毒湯

香 茹 滑 石 澤 瀉 木 通 葛 根 薄 荷

木 瓜 甘 草 厚 朴

鬼胎屬女人淫液所結

夫男女交媾。各有精施。二精交暢。合而成孕。是精必因火觸而動。凡室女少婦。及不得於夫者。每多思想。所欲不遂。則肝腎相火。無時不起。故男女性淫者。多夢與鬼交。鬼者。肝之氣也。精者。神之液也。夢交時。婦人之淫液。流於子宮。結爲鬼胎。或謂陰陽妙合。始成胎孕。獨陰不成。爲何而有女精成胎之理耶。不知陽者。火也。陰者。水也。本婦之相火。卽爲陽。淫液卽爲陰。鬼胎之成。女人一身之陰陽配合耳。所謂鬼胎者。僞胎也。似乎胎而實非胎也。其狀與正胎易混。然見症迥殊。脈必沉細。或急如狂風驟雨。少停一刻。復來如初。或胎伏不動。反覺上搶心悶絕。或腹中沉重。按之冰冷。不時微痛。雖有形如抱甕狀。滿腹不動。但當臍下翕翕動者。是也。第伏而不動者。亦有好胎。宜服順氣和血之藥。異胎以鐵器燒紅。醋淬數次。溫熱。投朴硝一兩服之。不應。以牛膝桃仁各一兩。大黃五錢。三棱蓬朮芒硝各三錢。水酒煎就。調麝香。

一分。雄黃一錢五分。與服。異物卽下。凡妊娠十四月而不產者。卽爲鬼胎。必當下之。

(附)羅謙甫腸覃石瘕論

羅謙甫曰。婦人腹如懷子狀。醫者不知內經有腸覃石瘕之病。而疑爲妊娠。經云。腸覃者。寒氣客於腸外。與衛氣相搏。氣不得榮。因有所繫。癖而內著。惡氣乃起。瘕肉乃生。其始生也。大如鷄卵。稍以益大。如懷子狀。久者離歲。按之則堅。推之則移。月事以時下。此其候也。夫腸者。大腸也。覃者。延也。大腸以傳導爲事。肺之府也。肺主衛。衛爲氣。得熱則泄。得寒則泣。今寒客大腸。故衛氣不榮。有所繫止。而結瘕在內。貼著延久不已。是名腸覃。氣散則清。氣聚則濁。結爲瘕聚。所以惡氣發起。瘕肉乃生。小漸益大。至期而毖。腹如懷子。此氣病而血未病。故月事不斷。應時而下。本非胎孕。可以此爲驗辨。木香通氣散主之。石瘕者。內經云。石瘕生於胞中。寒客氣於子門。子門閉塞。氣不得通。惡血當瀉不瀉。瘀以留止。日以益大。狀如懷子。月事不以時下。皆生於女子。可導而下。夫膀胱爲津液之腑。氣化則能出矣。今寒客子門。則氣塞不通。血壅不流。結硬如石。是名石瘕。此先氣病而後血病。故月事不來。非大辛熱不能已。可服見睨丸。和血通經湯。

女科指南集卷二終

女科指南集卷三

古越王慎軒鑒定

申江戴烈武承氏著

古越王景賢校正

臨產門

臨產總論

夫產育一事。天下古今之常事也。而實生死攸關之重事。何則。順而易者。無險不夷。逆而難者。無夷不險。要之造物原不令人逆生。而人自逆之。彼蒼原不致人難產。而人自難之。其緣有因於平時者。有因於臨時者。平時者。胎前之不調也。臨時者。用力之太早也。胎前失於調理。榮衛必致虧損。臨時用力太早。生門必循錯路。輕則致疾纏綿。重則立時歸冥。不亦重可駭哉。所以爲夫君者。宜討論辨究於居恆。使平時知所戒謹。臨時識其時候。得其自然之理。如菓熟香飄。瓜熟蒂脫。初何嘗有藉於醫林之藥石哉。不然。胎教之法。既不之信。而凡禁忌者。復迷而不悟。其爲難產何疑耶。下文斟酌諸產催生之法。良費苦心。閱者幸勿忽玩焉。

臨產辨死生法

凡臨產時。須看產婦面舌。以驗子母生死。面以候母。舌以候子。百不爽一者。如面舌俱赤者。

子母無恙。面赤舌青者。兒死也。面青舌赤吐沫者。母死也。唇舌俱青。兩邊沫出者。子母俱不救。如舌色或黃。或白。不能鮮紅者。兒雖未死。生下必不育也。

臨產離經脈

凡脈一呼一吸爲一息。一息之間。脈來四至爲正。再加一至尤妙。合於五藏。更得其正。若一息三至。或二至。或一至。或沉或細。或滑。孕婦臨月。見此應當分挽。

臨產斟酌九則

一戒用力太早

臨產之婦。最要識一時字。後時之弊尙輕。先時之弊極重。蓋胎已足月。子如夢覺。必然翻身轉側。動則腹痛。動而極。則胞爲其破矣。破則從其路而轉身端正。然後順流而下。脈訣所謂夜半腹痛應分娩。來朝日午定知生。正產時未至之候也。斯時行立坐臥。聽其自然。無爲驚慌。無爲欲速。待至產時已正。自然無滯。若始覺腹痛。便認以爲可產。而卽用努力。其如兒身未轉。卽轉而尙未正。遽用努力迫之。令兒錯路。必至橫生者有之。倒產者有之。甚則胞衣先破。被風所吹。而產婦腫脹者有之。難產之症。猶如蜂起矣。爲害可勝道哉。今而後。凡將產者。

穩婆專心推度。產婦極意審察。必臍腹痛急。腰間甚痛。眼中如火。二陰挺併。中指跳動。胞水或血俱下。始爲子出胞戶。然後用力送之。庶不誤事。如數症未到。卽一日半日不產。切不可驚惶憂慮。使產婦膽怯力衰也。

二辨試月弄胎

夫臨產錯用努力。多致大害。且有試月弄胎之症。所以欲速之更不可也。如一月前。忽覺腹痛。似可便產。而却不產者。名曰試月。臨月腹痛。或作或止。甚至三四日不已者。名弄胎。二者皆緣曲身觸犯所致。非當產也。胎水有無。並不足慮。均以佛手散安之。如此而誤用其力。其爲害更何如耶。總之腹雖痛而腰不甚痛。陰不挺併。兩目安靜。俱爲產時未至。第寬心待時。忍耐行動而已。卽步履艱難者。亦當凭几物而立待。至可行卽行。無爲任意睡臥也。試月用知母爲末。蜜丸。白開水下三錢卽愈。

三戒強服催生

夫產育一事。造化自然之理。如菓熟香飄。瓜熟蒂脫。何嘗有藉於醫藥之催哉。卽使欲催之。亦必視其時勢之何如也。乃世之醫者。不審如何時至。如何當催。一見腹痛。便用猛藥以擊

之。亦致難產之一端也。且催生之法不一。澀滯者。催以流通。閉塞者。催以逐瘀。凝結者。催以開竅。氣滯者。行氣。血乾者。補血。本虛者。益元。症有殊途。法有各異。况必待時至。然後用之。庶得合同。若先時強服。輕則累日不產。重則枉折兩命矣。惟可稍服調和氣血之藥。庶無害焉。

四戒曲身眠臥

夫臨產時。產婦宜舒身行動者。良欲便胎元之轉動耳。蓋胎必轉正。始得下達。若產婦畏痛。或曲身拘腹。或固執攣睡。兒循生門。被母曲腰壓閉。如此再三。胎已無力。而不能轉動。必致難產。人見其不動。則謂胎死。不知非死也。緣無力也。此時任有良方妙藥。不能令子有力而動。惟心安氣和。徐徐待之而已。又有胎水已下。子忽不動。切不可驚恐憂疑暴躁。蓋恐則神散。憂則氣結。暴躁則氣不和。多致煩悶血溢之症。知此善調。自然無恙。

五戒穩婆逼迫

夫臨產時用穩婆。以其歷世已久。卽問途必於已經之意也。乃有不知時候。惟恐後時者。有急完此家。而復往他家者。極誤大事。蓋此輩無書傳。無師授。自然之理。茫乎未聞。惟逞己意。膽力。誤人生命者多矣。宜詳諭之。以預防其逼迫。保產云。臨產穩婆不可不用。亦不可專意。

信從。良有以也。

六戒凶服入房

夫孝服凶器。易使產婦起悲傷恐懼之心。觸動胎氣。恐致難產之患。故宜逆絕之。

七戒不進飲食

人以飲食爲本。而一身之強弱係焉。能進飲食則氣粗膽雄。不致虛乏。若穀氣衰少。則精氣不壯。臨時無以用力。所以宜進稀粥。以充飢渴。然不可太飽。恐其阻正氣故也。

八戒多飲茶湯

膀胱水府也。一身之水。從此而出。過服水漿。則尿管脹滿。恐致膀胱破損之患。故須慎之。

九戒用刀

夫難產之故。各有其原。得其原而治之。難可轉易。乃世有逞膽穩婆。一見難產。便用法。深可懼焉。蓋胎死腹中。尙可導下。卽不服藥。但能安心平氣。亦遲遲生下。可見死胎。且不必用刀。況活胎乎。若輕用白刃。斷兒手足。必至腹中擾亂。兩命俱傷矣。慎之。

十二產論

正產

正產者。婦人懷胎足月。覺臍腹痛極。腰間重痛。眼中溜火。穀道挺併。漿破血溢。兒卽順下。此產得平正之理。故曰正產。

催產

催產者。婦人欲產時。諸症畢具。已見正產之候。竟延遲不下者。宜服藥以催之也。

凍產

凍產者。冬月天寒。產婦血氣凝結。以致難產也。室中宜置火爐。內解寒氣。兼進十全大補湯。

熱產

熱產者。盛夏暑熱逼襲。以致血滯難產也。室內宜置水缸。以解暑熱煩悶。兼進天水散。

橫產

橫產者。手先出也。名曰討鹽生。緣轉身至手。產婦誤用努力所致。急令產婦仰臥。以鹽少許塗兒手心。仍以香油抹之。輕輕送入。以指摩其背肩。攀其耳。待兒轉身端的。遂服濟生湯以助精力。一方用黑豆一合。河水童便各半煎服神效。但用手法時。產婦斷不可用分毫之力。

亦不可憂疑恐懼。使氣散亂。

倒產

倒產者。足先出也。始因不知時候。誤用努力。既而襁婆無主。任其妄出。斯時不知治法。必致兩傷。宜見兒足略有出意。卽令產母仰臥。照前法送入。但不可令兒足多出而時久。蓋少出而未久則易入。若所出既多。而時又延久。手足必然青硬而難入。可不慎與。

礙產

礙產者。轉身時臍帶絆於兒肩。已露頂而不下也。急令產婦仰臥。輕輕令兒向上。以指輕按兒肩。候兒順正。然後用力送之。

偏產

偏產者。生路未正。產婦用力太早。令兒偏著左右。似乎兒頭露而不下。不知其露者。乃額耳非頂也。亦令產婦仰臥。輕輕推兒向上。審是偏左偏右。以手扶頭端正。然後用力送之。此產與礙產易混。最要體認。

脹產

橫產者兒頭後骨偏柱谷道而不下也。治法於谷道外旁輕輕推兒頭令正然後用力送下。或用熬鹽盛於布袋熨之自下。

坐產

坐產者兒將欲生其母疲倦久坐椅褥抵其生路至於難產急於高處擊一手巾令產婦以手攀之輕輕屈足坐身令兒生下。

盤腸產

盤腸產者臨產母腸先出然後兒生下也。緣人之二腸俱有脂膜聯絡間有生成無脂膜聯絡者則產時其腸隨兒而下其法急將淨盆盛溫水寒天則熱水少入香油養潤待兒併胞衣盡下令產婦略仰臥自己吸氣上升穩婆以香油塗手徐徐送入一法以葶麻仁四十九粒研塗產婦頭頂腸收上急洗去遲則有害又方以半夏爲末搐鼻自上。

死產

死產者臨產時胎死腹中也其原有因臨月母患熱病而死者有因跌仆而死者有因下血太早如魚水涸而死者宜分症用治其法與前條斃胎無二此亦無贅。

五難產

難產屬交骨不開

婦人陰戶之上。有骨橫貫節。駢相湊者。謂之交骨。臨產時。產婦百節開張。此骨寬放。是以兒能生下。此造化之巧。生育之關也。若正產之候。種種呈露而卒不得下者。交骨不開故也。緣胎前失於調理。致元氣虛弱。氣血不能運達而然。是症生於少婦初產者多。以其本體軟怯。神氣虛弱。產戶未舒故也。若中年之婦。必氣血虛弱者。或生育既多。元神衰敗者。均足致此症。以芎歸牛膝葵子各一兩。酥炙龜板一具。髮灰五分許。以補陰氣。蓋交骨不開爲陰虛。龜乃至陰之物。用板則補陰。髮爲血之餘。取灰則固血。芎歸葵膝。俱是利產之品。治法無餘。無剩也。或有不及者。佐以開骨膏。

開骨膏

急性子

穿山甲

猪牙皂各七錢

麝香七分

共爲極細末。煉老蜜和勻。捏

作條子。納入陰戶。近交骨處方止。外用葱一斤煎湯。令產婦坐湯。將手按摩。交骨自開。

難產屬安逸氣滯

夫血之運行。由於氣之健動。氣滯則血凝。臨產時兒隨胞血胎水而下。若胎前過於安逸。則氣滯血凝。而難產無逃矣。欲利其產。當先和血。欲和其血。莫先調氣。以加味濟生湯主之。本方有加減法。枳殼、香附、川芎、當歸、葵子、大腹皮、烏藥、車前子、牛膝。勢急者加急性子。

難產屬敗血壅滯

夫養胎之水。謂之胞漿。養胎之血。謂之惡露。臨產時兒既拆胎。胞漿與惡露。護兒而下。所以產之易也。若胞漿先破。而卒然暴下。迨至惡露來時。漿水已竭。則血自澀滯不流。而閉塞生路矣。斯時子雖求路而出。將何所趨向乎。驗其臍腹急痛。脹滿難忍。手不可按者是也。速宜逐去瘀血。兼進滑利之藥。自然道路通達而產矣。

滌路湯

川芎 當歸 桃仁 赤芍 牛膝 益母
香附 葵子 肉桂 夏月去桂

難產屬胞液短少

夫臨產時。兒體動盪。則胞胎迸裂。胞破則血水俱下而產。俗所謂胞漿者。乃養胎之液也。若

胎前過服利水之藥。或臨時胎水暴下。皆足致胞液乾涸。而生路澀滯。語曰。琉璃胎主易產者。以其胎水盛也。若遇是證。大劑送子丹。蜜油煎潤之。

仙人送子丹

川芎 當歸 牛膝 各一兩 黃葵子 急性子 各五錢

夏月加 滑石 一兩 各月加肉桂 一錢 本虛加人參 一錢 順流水煎服。

蜜油煎 白蜜 麻油 各一酒盃 燉熱溫服。

難產屬精力虛乏

夫產婦用力太早。前已詳其害已。而精力不繼之。亦因乎此者。良以產時未正。遽用努力。及兒欲生。母力已乏。必然停住難產。所以用力宜合時也。以獨參湯助之。

初產門

初產須知

一初產時胞衣未下。臍腹甚痛。腹皮不寬者。必是雙胎。

一兒出產戶時。人卽以兩手輕抱產婦胸前。產婦用兩手緊抱肚臍。令胎衣下墜。如胎衣來

遲。不可輕斷臍帶。先用琴絃緊繫於半中。再用軟帶繫住。然後以艾葉爲撚。香油浸溼。燒薰至焦。方可作斷。繫時宜輕巧堅固。以此帶極脆。須要小心拏定。

一產畢未可卽時上牀。且扶住閉目而坐。令人從心按至臍下者數次。然後扶至牀褥。一日不可睡倒。二三日間。雖睡時亦須頻摩臍腹。勿使惡露留滯爲妙。

一分娩方已。速燒紅炭淬醋於器。使醋氣薰沃房室。除血暈解穢爲要。或以漆紙燒烟時聞之。亦妙。

一產畢宜多服熱童便。冬月加薑汁一匙。

一夏月凡燒醋炭漆紙等物。皆於房外燒之。使氣入室可也。一切火爐熱物。不可置房中。令產婦煩躁。

一產畢只宜服童便。不可飲酒醴。蓋酒性極熱。產婦臟腑暴虛。得酒助熱。必至孤陽載血上奔。成爲昏暈。

一冬天產室不宜有隙。致風邪射入爲害。臥牀四圍。宜密固之。

一產後忌大喜大怒。蓋喜則傷心。怒則傷肝。犯此必致昏暈。故宜恬靜爲妙。

一產後力倦久睡。要頻頻喚醒爲妙。

一產婦臥法。宜仰不宜側。宜豎足不宜伸足。恐敗血流於腿足間之經絡也。

一產後脾胃虛弱。飲食過多。則難於運化。若食魚肉等物。必致內傷成積。五六日內宜食軟粥香蔬。七日外方用肉糜。

一產後七日內。血氣未定。不可洗浴。七日外可微洗手面。月外可洗浴。一百二十日。不可作勞。

一產後不可多食鹽。蓋鹽能發嗽。且止血少乳故也。

一產後倘值夏月。忌貪涼用扇。食冷物。當風睡臥。

初產症

息胞屬血流脹滿

胞衣者。護兒之衣也。臨產時兒既下。則衣亦隨之而下。乃有兒下而胞不下者。名曰息胞。由於停滯之間。敗血流入衣中。爲血所脹。以致道塞不利而然也。病雖已產。較之未產更重。治之稍緩。胞卽上衝心胸。必致瘀痛喘急。而莫可治療矣。急服回生丹。或珀琥丸。以逐去衣中

之血。庶得脹消下達。是藥若不預備。以奪命牛膝失笑代之。

奪命丹

官桂二錢五分

丹皮五錢

乾漆煨烟盡一錢五分

桃仁泥五錢

共爲末。

將大黃末一兩。醋煑爲膏。和前藥分作十二丸。每用一丸。熱童便加醋二匙化服。

牛膝湯

牛膝

歸尾

木

通各三錢

葵子

五錢

瞿麥

一錢

肉桂五分

甚者加朴硝三錢

失笑散

五靈脂

蒲黃等分。末服三錢。

捷法

草麻子四十九粒。搗塗右腳底心。下卽洗去。遲則有害。一方用半夏末吹鼻取嚏。大

妙。蓋取激動關竅之意也。

息胞屬氣虛難送

女科指南集卷四

古越王慎軒鑒定

申江戴烈武承氏著

古越王景賢校正

產後門

昏暈總論

夫產後最可慮者。昏暈之證也。昏暈亦非一端。有緣於敗血者。有緣於痰火者。有緣於元虛者。其證若同。其致各異。得其治則生於瞬息。失其治則斃於俄頃。且受病之經。亦各迥殊。如邪流於肝。則目生黑花。牙關緊閉。眼合不開。入於心則面赤汗多。神昏不語。入於肺則喘急鼻扇。面目黧黑。敗血痰火之證。病本於實。榮衛兩脫之證。原由於虛。虛證治以保元。實病治以驅邪。分經若牛女之隔。證治猶參商之遠。毫釐差謬。生死攸關。世之醫者。凡遇是病。不審爲血爲痰。爲火爲虛。而概號血暈。一以泛常執滯之方。治變證百出之病。迨至不效。轉曰虛脫。嗚呼。證既明不。經復不辨。概用死法。將何以取效哉。愚深懼之。故備論也。使同人。有明哲之操。而不爲似是所惑云爾。

昏暈屬敗血上奔

夫人身之所賴以養榮者血也。血之所以能養榮者。爲新不爲舊。舊血宜俾其達下而不使上奔。始爲良工。凡人且然而況於產婦乎。產婦之體。非傷弓之鳥乎。氣之往來上下。而不爲病者。得血以制之也。血既暴下。則氣無以制。而惟事縱橫衝突。俾稟承剛健之物隨之。本潰而壅於上焦。輕則入肝木。重則流心脾。片言半語之間。忽見昏潰神迷。卒不識人矣。急用搐鼻法。隨灌回生丹。琥珀丸。或獨勝散。滌痰湯之類。方可解禍。

搐鼻法

韭菜一把。搗爛。入有嘴壺瓶中。熱醋沃之。卽以瓶嘴對產婦鼻。令氣透納卽甦。更燒漆紙於牀前。以漆能下惡露。醋能收神也。

滌痰湯

益母 山查 香附 枳殼 紅花 桃仁
赤芍 澤蘭 琥珀丸醋少許童便化服

昏暈屬痰火泛上

昏暈屬痰火者。痰迷心竅之證也。蓋痰卽有形之火。火卽無形之痰。未有有痰面無火。有火

而無痰者也。痰少則爲液。火少則爲氣。痰盛則泛濫洋溢。火盛則煎熬攻擊。痰隨火而升降。火領痰而橫行。火者助痰爲虐之賊也。然亦各有所自。火借氣於五臟。而勢始盛。痰借液於五味。而形乃成。氣有餘則化爲火。液有餘則變爲痰。氣能發火。火能役痰。痰火互結。奔潰飛騰。不特貯痰之所。爲其擾害。卽靈明之臟。無不爲其膠錮而迷悶矣。夫心爲君主。象離而易動者也。當陰氣暴亡之時。而陽氣無攝。一任縱橫亢上。衝入於神舍之間。其能免昏暈瞋目乎。然陽旺痰歸之證。與敗血上奔之證。於何而辨之。曰視其見證脈息而已矣。敗血之證。大多惡露不通。彼則疎泄如常。痰積之疾。脈居孔實。彼則弦滑而緊甚。有沉細如絲者。有全伏不見者。外此如手足抽掣。真心跳動。唇口乾燥。驚悸恐畏等證。皆痰火爲患之見端也。因證施治。必用牛黃丸以豁痰制火。清魂湯以順氣和中。庶可救免而返命耳。

清魂湯

枳殼 廣紅 膽星 杏仁 瓜蒌 前胡

鮮首鳴 玄明粉 加菖蒲汁竹瀝薑汁 熱甚加黃連 舌黑加犀角

產後昏暈屬元氣虛脫

心藏神得血而守。神守則可以宰一身而清甯。神散則不能爲君而昏暈。神與血固兩相需而兩相輔者。然產婦懷妊。則一身之精神。灌溉於胎。臨蓐則一身之氣血。耗散於產。當分娩之時。榮血暴下。血室空虛。靈明之藏。神無所養。則恍恍惚惚。而不能收攝矣。雖曰。心爲諸藏之宰。神舍之血銷鎔驟去。不惟無以爲諸經之所尊。而本位亦難乎鎮定。安得不搖亂而昏憤者乎。驗其面白唇灰。手足厥冷。氣衰息微等證。元陽虛脫之象。端的無疑。先用熱醋塗其口鼻。次燒漆紙於牀前。隨進獨參湯一碗。俟其醒來。再用攝神養血湯。庶可解禍。

攝神養血湯

人參 黃耆 蓮肉心 五味子 麥冬 歸身

熟地 牛膝 磁石

產後惡露不下屬寒阻

天有寒而雨露凝。地有寒而河冰結。人有寒而榮血瘀。三才本可以並行者也。而因取之齊觀。何則。蓋天非自寒也。春夏遠而秋令去。惟存肅殺之令。則流通者皆凝結停止而堅牢矣。人非自寒也。少火除而眞陽退。惟存獨陰之物。則往來者。皆凍瘀泥止而留滯矣。凡體皆然。

而況於產婦乎。產婦元氣暴虛。陰陽離散。命門之火失其常。靈明之火失其職。譬之鰲山走馬諸證。火熄則軸止。二火交虛。則惡露雖爲宜下之物。然將何以運動而使之周流無滯乎。且當氣離血散之候。不惟本體之陽光無以輝耀。卽天地陰陽之氣。莫非凝瘀之媒。此時而欲爲治安。非辛無以爲開導。非熱不足以禦寒。得二性之沖和。而更用導瘀之劑。庶不至冰伏而爲患無已矣。

方

肉桂 炮薑 川芎 當歸尾 桃仁 香附

澤蘭 赤芍 查肉 紅花 益母

產後惡露不下屬熱阻

惡露不下。有寒凝而不通者。有熱結而停滯者。寒凝不通。治以散寒消瘀。人盡知之。知其熱則能行之說也。至停滯而因乎熱結者。人豈知之哉。有如臨產而違血痢。有如臨產而遇中暑。有如臨產而病傷寒。有如臨產而患乾霍亂。茲數者。皆火熱之證也。有此惡證。必至邪陽亢極。烈熱如爐。體中凡屬真陰。遇之無不消鑠。陰卽無虧。其能免瘀結不散乎。治熱必用寒

涼。以瘀積而遇寒涼。瘀何能散。孰知寒凝如水結成冰。非煖則凍不解。熱結如物被火炙。炙之不已而堅硬矣。不得涼解以疎之。停滯何消。豈可曰寒則凝滯。熱則流通。而概用芎歸。益母加炮薑肉桂而冀行之哉。如用薑桂。產婦之命。已屬幻化矣。尙有身外之血否耶。總之有病則病受。血因熱而瘀者。除其熱而血自散矣。甯有產後忌涼寒之理乎。萬不可執一而論也。欲酌成方。方難據執。開列藥品於後。以便選用。

黃芩 黃連 大黃 滑石 木通 山梔

桃仁 赤芍 紅花 枳殼 益母 澤蘭

山查 香附 延胡 靈脂 青陳皮 血見愁

荆芥 前胡 葛根 羌活 薄荷 柴胡

產後惡露不下屬風阻

產後惡露不下。因寒因熱者。前已陳其概矣。而此又屬於風者何哉。良以產婦之體爲虛羸。腠理萬難密護。稍一感冒。卽爲寒熱。寒則不必振戰。已見其冷。熱則不必煩悶。而已見其燥。而且陰勝而寒自至。陽勝而熱自來。寒熱互作。必至頭暈目眩。憎寒發熱。當此血室空虛之

候。不能自衛。風熱必然乘隙而入。一入其室。血卽瘀結。上攻則胸膈不舒。下遺則少腹疔痛。求其下達通行不可得矣。欲冀其通。必去其病。輕則破瘀而帶疏散。重則疏散而兼破瘀。總之於風熱瘀積之間。權其緩急輕重而處方已耳。不可謂產後虛弱。禁用汗吐下三法。聽其表邪不徹。以致纏綿入裏。變爲熱結不下之證也。幸甚幸甚。

疏風導瘀湯

薄荷 荆芥 前胡 桃仁 赤芍 益母

枳殼 查肉 青皮 無汗加葛根 熱甚加黃芩 汗出口渴去葛根

加石膏。前方治之不應。必至熱結不下。宜參前條加減可也。

白惡露屬氣虛不能運化

血之所成。精之所化也。精之所化。氣之能運也。得其生化之源。則體強而病無由生矣。何則。精爲未化之血。血爲已成之精也。元旺則榮血與日俱增。氣虛則不能變精爲血。故形體虛弱之人。榮衛日虧於不足。其受孕而墮之以養胎者。不惟血而已也。卽元津神液。亦融護於胞胎之間。及其既產之後。不惟惡露寡少。而於將盡之時。所下有稠濁色白。形似癰膿者矣。

此其故何耶。索而究之。原係養胎之濁液。而所以若此者。由於中氣下陷。脾精不守。不能輸爲榮血之故也。色雖迥殊。亦爲惡露。先哲云。白屬氣虛。良不誣也。又曰。氣有生血之功。則知欲生新血。先滋化源。病不在表。還以本治。探本窮源之法。必用參耆白朮以培中土。土得輸則中氣足。而得轉運有基。佐以芎歸丹參。以生血養陰。則榮衛盛而陰液得以和暢。所謂虛者補之。正妙於虛者也。司命者。可不窮源及流。以爲治病之本者哉。

益氣養榮丹

人參 黃耆 白朮 茯苓 川芎 當歸

熟地 丹參 蘇梗 香附 加天棗 蓮肉

產後惡露不止屬脾虛血熱

產後惡露。大約一月爲期。月內卽止者。臨暮時肝經不能收攝榮氣。使諸血失道暴行。一時過潰之故也。月外不止者。緣於脾氣不信。不能統血。使陰經妄被邪陽陷害。難於納氣歸元。故有淋漓不絕也。何則。蓋脾爲五藏之根基。諸血之領袖。脾氣充則陰有約束。脾氣散則血無統領。猶之三軍之衆。將令森嚴。軍容秩秩。刁斗不繼。士卒懈弛。況乎全軍旣覆之時。殘兵

自然奔潰。可見脾實能統。猶將之能約三軍也。脾虛不攝。猶軍之敗而士卒遁也。但是症必兼怒火鬱熱二項。大全云。惡血不盡。臟腑挾於宿冷。故令不絕。夫經血虛損。不足是也。彼以不絕。主於宿冷。內經云。血得熱則行之。謂何。而有寒冷致病之理耶。此法不可訓也。以健脾固血湯主之。

白朮 白芍 當歸 延胡 丹參

生地 丹皮 條芩 山梔 香附

產後狂越屬瘀積迷心

狂者。狂亂而無正定也。越者。乖越禮法而失常也。見證大約少臥而不飢。自高賢也。自辨智也。自貴倨也。喜笑好歌樂。妄行不休息。甚則棄衣而走。登高而呼。踰垣上屋。罵詈不避親疎。究其原。由人之心有孔竅。無所窒礙。主靈明而宰萬事。產後諸血暴下。神舍空虛。當敗血橫行奔走之時。而衝入膠髓。則心無所主。而狂越之證作矣。須察其六脈芤滑。惡露頓止。漱水不欲下嚥。方爲瘀血迷心之證。以琥珀丸主之。兼進滌瘀散。

桃仁 靈脂 蒲黃 莒蒲 木通 青皮

歸尾 牛膝 延胡 水煎。沖硃砂一錢。溫服。

產後狂越屬痰火迷心

狂越一證。前已責之積血矣。茲又咎夫痰火者。以外清內濁。動亂參差。火之體也。腎水主志。而水火相反。心火旺則水衰。乃失志而狂越也。經注曰。多喜爲顛。多怒爲狂。蓋以喜爲心志。心熱甚則多喜而爲顛。怒爲肝志。火實制金。不能平木。肝氣實則金多怒而爲狂也。然火爲無形之氣。痰爲有形之物。痰非火不能鼓運。火非痰不能迷心。當元氣耗散之時。一水不勝二火。而君相之邪。內外相煽。兼之素有痰鬱。因火鼓動。窒礙心竅。所以昏不知人。而爲狂爲越也。見證與瘀血攻心之證。大相徑庭。如六脈或洪或數。或沉細如絲。或伏而不見。作渴引飲。兩頰通紅。氣粗煩悶。人必強揚。惡露不息。諸證。痰火爲患了。然以牛黃丸紫金丹治之。

煎方

犀角 大黃 膽星 杏仁 瓜蒌 元明粉

海浮石 鮮首烏

產後不語屬痰壅

心者。君火之官。神明出焉。外應乎舌。舌者聲之機。然必出於肺而爲聲。以五行惟金響。金應於乾。乾爲天。天爲陽。爲健爲動。金本燥。爲涸爲收爲斂。爲勁切。爲剛潔。故諸能鳴者。由其形氣之鼓激。鼓激者。乃健運之動也。心聲迷悶。則舌強不語。猶之管籥之竅。外物蒙閉。則極力鼓之而無聲矣。彼火旺痰盛。乘入於肺者。烏得不神濁氣鬱。而欲語無聲乎。每見喜哀自若者。飲食如常者。惡露無故者。忽於言語之間。叩之無聲。問之不答等證。非痰壅上焦之明驗耶。以五鳳丹微吐之。再進牛黃丸紫金丹一物散之類。并濟之以滌痰之藥。聲自出而愈矣。

宣聲飲

杏仁 瓜 藟 海浮石 膽 星 石菖蒲 鮮首烏

產後驚悸屬心虛

驚心卒動而不甯也。悸心下垂而揚搖也。其狀與怔忡相似。但怔忡乃發作有時。驚悸則無時而作者是也。蓋人之所主者惟心。心之所主者惟血。心血一虛。神氣定然不守。而爲虛邪所乘。令心氣受搏。則動搖無定。躍躍靡甯矣。診其脈濡弱少神。覘其容面無華色。聆其音重語聲輕。合之於精神困倦睡臥不安等症。宜以安神散主之。

人參 茯苓 棗仁 當歸 麥冬 白芍

柏子仁 龍齒 遠志 蓮肉 另用鈎藤煎湯代水。

產後驚悸屬痰鬱

丹溪曰。痰鬱於內。則遇險臨危。觸事喪志。心爲之忤。使人有惕惕之狀。夫痰從虛而入者也。產後元氣本虛。水難制火。熱氣上乘。痰壅藏府。經脈閉遏。氣不宣通。而齶然跳躍驚厥。皆係火爲陽邪。外清明而內濁昧。其主動亂。故神志失常如此也。守真云。火主動。心火甚則喜驚。此言不信然乎。以牛黃丸紫金丹治之。

產後乍見鬼神屬心虛夾痰

夫言爲心聲。心正則言順。心怯則語亂。產後心血虛耗。精神疲倦。心主無養。則眼目昏花。以血氣者。身之神也。目爲五藏精華會集之地。藉血養榮而得安。神旣衰乏。加之痰客中焦。妨礙升降。不得運用。以致十二官各失其職。故視聽言動。皆爲虛妄。所以鬼無形而若有形之可覩。神無像而若有像之可窺。是皆肝經血虛氣實之故也。先用牛黃丸紫金丹以豁痰鎮肝。如痰輕而虛甚者。安神湯以養血甯神。虛不甚而痰涎多者。清魂湯以鎮肝豁痰。俾痰盡

血足。自然神有定舍而安矣。若果係鬼祟所附。卽灸鬼哭穴可效。

安神湯 見驚悸

清魂湯

膽 星 犀角 丹皮 鈎藤 龍齒 蓮鬚

鮮首烏 蓮心

產後腰痛屬氣凝血滯

婦人以氣血爲本。而病之有無係焉。氣血或瘀或行。而病之輕重存焉。何則。蓋氣與血兩相輔而不相離者。血不得氣。則頑而不化。氣不得血。則鼓吹無地。氣血凝滯。則百病蜂生。况產婦臨蓐之時。臟腑經絡。俱爲散布。惡露周流。自無沉疾。若一凝滯。害卽應乎脾腎。以腹爲脾之宗。腰爲腎之候。脾受瘀則腹疼。腎受瘀則腰痛。二經爲不受誣之臟。故病卽發於此也。然必驗其腹中板硬。上下往來。或惡露不下。或不快利。按之不甚等症。始爲瘀積不盡之候。以導壅去瘀湯主之。

靈脂 蒲黃 歸尾 益母 赤芍 桃仁

青皮 香附 紅花 延胡 牛膝 發熱加荆芥柴胡 瘀

重加血見愁 寒重加肉桂炮薑重加鼈甲 如熱結不化者芩連亦不妨用也。

產後腰腹痛屬血虛空痛

人身之血隨氣運行。周流無滯。灌溉五臟。榮養一身。旺於內。明足以察秋毫。心足以應萬事。旺於外。則筋強而力倍。髮潤而爪華。唇若桃舒。面若杏吐。皆氣血有餘之明徵也。孰知有榮極則枯。旺極則衰之理乎。枯則不必言其竭也。即寡而已見其凋殘。衰則不必言其盡也。即少而已見其零落。至於產婦尤莫甚焉。產婦之所賴者惟血。血足則胎元包孕。如萬物之資生於坤元也。得氣而旺。如土脈之賴滋於陽和也。通調滋養。如天喬之敷榮於地道也。設或虧損。則體不能藉剛健而成載物之功。用不能象順德而合博厚之道矣。而且坐草之時。五臟六腑。俱令困乏。臟腑之中。脾腎兩經。尤宜血養。血若不足。則經脈無滋。而百病齊生。然病之生也。尤莫先於腰疼腹痛。第是症之發。不若風寒暑濕之暴厲。診之六脈沉細而濡。察之神色少榮倦乏。審其痛處。按之則緩。以補血之劑主之。

八珍湯加黃耆丹參製首烏

產後乍寒乍熱屬氣凝血滯

衛虛則惡寒。榮虛則惡熱。陰勝而寒自至。陽勝而熱自來。陽不足則先寒。陰不足則先熱。此主氣血固然之論也。乃有氣凝血滯。而爲乍寒乍熱者。又不可概以虛論矣。何也。蓋身之運行者惟氣。氣爲瘀積所侵。則氣失其運。而脈絡爲之阻塞。陽剛之性。不能健運於中。而惟有陰榮凝滯。其能免淅淅惡寒之症乎。抑身之賴以滋養者惟血。血爲凝結而蓄聚於中。則血失其養。而日被遏鬱。鬱則生熱。熱邪發於內。而欲達於外。其能免身之蒸熱也乎。外見少腹板硬者。漱水不欲下嚥者。或一日寒熱幾作者。或日輕夜重者。或流於下部而爲兩足痛者。或滯於經絡而遍身痛者。皆氣血凝滯之明徵也。以秦芫柴胡湯主之。

柴胡 秦芫君 延胡 白芍 當歸 丹參臣

鱉甲 牛膝 香附佐 紅花 甘草使 瘀重加桃仁 寒重加

肉桂 腿足痛甚加血見愁 遍身痛甚加威靈仙 重用琥珀丸淡參湯服

產後乍寒乍熱屬表氣不固

何謂表。腠理是也。何謂表虛。表氣不固是也。氣爲一身之衛。內主充塞。外護腠理。氣虛於內。

則餒而不充。衛護無力。而致表虛。表虛則腠理不密。而氣難存養。氣又因此而致虛。而虛更甚。故表虛之體。客感易侵。未產之時。若有表症。便當疏邪實表。以預防其不振。臨蓐之後。症之虛象立見。外邪一擾。寒熱頓作。不拘病之新久。人之老少。但看人情懶倦。面顏晄白。二便清利。寒而不戰。熱而不煩。脣口不乾。不燥。體膚微汗時蒸。凡此景象。皆表虛也。卽有邪淫。不得與客感混同立論。悉以固氣實表爲先。稍兼佐理可也。

加味玉屏風散

黃耆 防風 秦艽 當歸 丹參 川芎

甘草 外用荆芥七錢。煎湯代水。煎服。俟寒熱不作。以八珍湯加黃耆、丹參、秦艽、治之。

產後汗多一屬陽虛一屬熱蒸

汗者。液之派也。腎之液。自毛竅出者爲汗。汗之亦是水也。可知其本於肺之通調四布。而得潤乎一身。滋養四體。猶之白露下草。降木敷榮。是水藏則存而爲液。疏則洩而爲汗。濇則皮毛枯澀。鬱則肢體浮腫。液汗之故也。亦多矣。但以產後之汗而言。氣虛則疏而汗洩。火沸則

汗湧如淋。故不可專以氣虛論。亦不可專以火熱論也。如身溫體倦。面白無神。四肢乏力。六脈軟虛。種種合乎氣虛者。當以實表爲主。以汗爲心之液。心氣不足。而真元耗散。則腠理皆開。肺失通氣之權。不能固表。故毛竅疎豁。以致汗流不禁也。當以保元八珍湯振之。否則氣既虛耗。而復汗洩。必致亡陽。而有虛脫之患矣。如煩渴壯熱。氣粗躁亂。通身焦燥如炙。惟頭面汗如籠蒸。或至兩肩而止者。或至乳房而還者。皆火擾於內。水沸於外也。良以人之水火。不容偏勝。水勝則火熄。火勝則水沸。烈火燔灼。五液沸騰。是汗之爲火迫可知。况夫火性炎上。兼之不容旁達。燄尤上竄。汗之所以上湧若蒸也。頭爲諸陽之首。輕清最上之地。邪陽不易犯者。又爲一身之樞紐。諸症吉凶之準。邪陽更不宜犯者。而汗若此。五內可知矣。以清火之藥主之。若誤認爲表虛汗洩。而概用收斂之藥。禍災立至。醫者宜細審之。

保元八珍湯

人參 黃耆 當歸 熟地 川芎 白芍

五味子 甘草

產後遍身疼痛屬虛風

風之爲病。感而卽發。是冒風症矣。此之見症。有兩臂酸痛。有兩肩板疼。有遍身酸滯。有兩腿沉痛。此虛而兼風之症如是也。以產後榮血不充。風乘如入無人之境。犯之可以直至筋骨。以致氣血難以運動。故爾往來上下而作楚也。以玉屏風酒治之。

玉屏封酒

羌活 獨活 桑朮 川續斷 牛膝 川芎

當歸 白芍 丹參 威靈仙 黃耆 防風

桑寄生 桑枝 水楊柳 無灰酒浸煮罈服

產後敗血流經

前篇初產須知。云產婦眠臥。宜仰不宜側。宜豎膝不宜伸足。恐惡露下注。成爲敗血流經之症也。患此症者。其候兩腿作痛。上至環跳。下及兩膝。或至脛骨。久則伸屈不便。行走不能。發出紅霞斑點。或紅或紫。大者如桃。小者如突。或不見斑點。將手按之而得瘀塊於皮內者。或滯於經絡。而爲遍身痛者。或兼蓄於肝膽。而爲寒熱頻作者。皆產後走動。血氣升降失常。凝滯於筋骨所致。蓋血爲鬱遏。榮失其養。致痛乃爾。更受逼迫。血失其位。致見此斑。是症久不

愈者。必變爲通經瘡。卽斑破而血流不已也。俗人多誤認爲葡萄風溼。治之轉劇。或知其爲血瘀之症。治之罔效。須於瘀而未死之日。及時破滌瘀血得活。諸症自愈。如未經產育而患此者。必經後敗血下注所致。不審其由。而僅用補益定痛之劑。以希止之。必至就木而已。異功酒

丹 參八兩 白芍 延 胡各三兩 當 歸 牛 膝各四兩

香 附 木 香 紅 花各二兩 甘 草七錢 病甚者加桃仁三兩

血見愁一兩四錢 遍身痛者加靈仙三兩 發寒熱者加秦艽柴胡各三兩 熱甚者加

鱉甲 寒甚者加肉桂分兩隨症

產後蓐勞

何謂勞。虛怯是也。何爲蓐勞。臨產時生理不順。去血過多。筋力疲極。兼之勞心焦思。致令虛羸。迨至產後而發爲虛弱之症也。其候自汗盜汗。寒熱食少。五軟不振。六脈無神。肺氣耗散。則發渴咳嗽。榮衛虧損。則寒熱往來。然必驗其嗽則聲輕而不猛。渴則杯飲而卽潤。與夫寒而不戰。熱而不煩等象。方合是症。以病多似是而非也。治宜存養溫補。俾諸經疲憊者。有以

反正。脾胃衰乏者。得以漸安。且使飲食加進。精氣化生。諸臟有所依賴。其症自愈矣。虛而兼熱者。胡連四物湯。四物加胡連青蒿秦朮鰲甲。

人參鰲甲散

人參 鰲甲 秦朮 黃耆 白芍 當歸

茯苓 地骨皮 丹皮

產後淋瀝屬膀胱積熱

諸淋所發。皆膀胱積熱也。膀胱與腎爲表裏。腎水不充。積爲內熱。熱客脬中。則淋瀝不已。宜五淋散。

瞿麥穗 葵子 滑石 杏仁各二兩五錢 通草

王不留行各一兩 紫貝二十五枚 石首魚頭中腦骨四十九枚 俱煨。共爲細末。木

通。廣皮各三錢 煎湯。加茅根汁對沖調下。四錢 再用食鹽寸香填臍中。以葱白十

餘根。作一縛。切一指厚。安鹽上。用艾火灸之。覺熱氣入腹。卽時便通。此方係治氣閉者

神効。

又方 用土牛膝根搗自然汁三酒杯。每用一鍾。將陳酒燉滾沖服。一服後。覺有一筋一頂而至胸。再服自胸而至臍。三服自臍下達而洩出矣。此方係熱閉者神效。須一時服盡爲妙。煎方 輕者用生地、丹皮、澤瀉、木通、滑石、豬苓、黃芩、山梔、車前。重者加牛膝、葵子、童便。再重者加大黃、黃連。

產後小便不禁分症用藥

產後遺尿之症有三。一屬於虛。一屬於熱。一屬於傷者。膀胱虛怯。氣道不能約束。未及氣化而水自遺出。如睡中來者是也。以八珍湯加益智、龍骨、桑螵蛸治之。熱者膀胱火邪妄動。水不得甯。故不能禁而頻數來也。其候霎時欲便。未及至器而溺已出。或痛或熱。雖數來而甚少。治以通調水道之藥。俟火熱退聽。而溺出清長。則愈矣。傷者緣臨蓐時。生理不順。穩婆不能小心謹翼。損破產婦尿脬。致病遺尿無時。其候面微浮腫。略發熱於午後。終日不小便。但淋瀝不乾者是也。以補脬飲治之。

補脬飲

黃絲絹 三尺自然黃者佳。細剪碎

黃 蠟

白牡丹根皮

白 芩 各五錢

白蜜 茅根各一兩 豬尿脬一具 右用水煎至黃絹豬尿脬麩爛如錫爲

度。極飢時服之。半日不得作聲。如作聲無效。虛者加入參一錢 白朮黃耆川芎當

歸各三錢

又方 雞胓脰一具。併腸洗燒爲末。酒調下方寸匕。

又方 白薇 白芍 龍骨 桑螵蛸各等分 爲末。食前粥飲調下二錢。

又敷藥方 赤石脂三錢醋煨 珍珠四分 龍齒一錢醋煨 象皮三錢研細末

多羅絨五錢 共研極細末。敷患處。

產後乳汁不通

婦人之血。上爲乳汁。下爲月經。而血之所化。則本於脾胃飲食之精微運行而爲乳爲經。產後脾胃之氣旺。則血旺而乳多。脾胃氣衰。則血減而乳少。又有氣壅而不得宣通者。以乳尖屬脾。乳房屬胃。厥陰之經多氣。陽明之經多火。陽明之外無大熱也二經爲客感所侵。卽爲壅滯其竅。而乳汁不下矣。治宜虛則補其不足。實則疎其有餘。挽之歸於無偏無著。斯爲良法。

通草散 治氣滯乳閉

不入枯礬、麝香少許。同雞肝乘熱納陰中。或小薊、蛇牀、煎湯時浴。蟲瘡溼癢者。歸脾加丹皮、山梔、柴胡、白芍。潰腐者逍遙加川芎。外以荊芥、蛇牀、煎湯薰浴。杏仁、雄黃、麝香、枯礬、敷之。交接出血者。雄鷄冠血塗之立愈。血不見而痛者。黃連、牛膝、甘草煎湯洗。石脂、五倍、爲末摻之愈。

龍膽瀉肝湯

膽草 澤瀉各一錢 木通 黃芩 車前 生地

當歸 甘草

乳疾

小兒吹風入乳。而發寒熱作痛者。俗名乳吹。以四烏湯加炒麥芽一兩卽止。不然最恐內結成膿。多至潰爛。乳房腫痛。用瓜蒌實一枚。連穰搗爛。甘草一寸。乳香一錢。煎成加酒溫服之後。側臥於牀。令藥氣行外。以天南星生末醋調敷。以手揉之自散。

乳癰方

大瓜蒌二個炒研 當歸三錢酒洗 乳香一錢五分去油 沒藥一錢去油

廣皮一錢 香附一錢五分 醋炙 青皮一錢 川芎一錢五分
甘草五分 水煎。酒沖服。

女科指南集卷四終

中華民國廿四年三月五日

收到

呈 繳



蘇州國醫書社新書提要

中醫新論彙編

本書係集中醫科學化之名著詳加評按分厚冊著
 中西並參新穎異方劑治療傷寒內科按外科類編
 理病理斷藥方劑治療傷寒內科按外科類編
 會女七醫學全書 全書四厚冊 實價銀五元

漢譯診病奇核

本書係採集日本三十二家之名醫診病奇法
 精確之診法後附五雲子腹診法尤為名貴誠屬醫
 實書也

傷寒時方評註

紹興傷寒名醫俞根初先生自製傷寒時方評註
 經驗良方適合實用現已編成歌訣詳加評註後附
 方歌及電時病方歌訣實家不可不讀之良書也
 溫病指南 全書一冊 實價銀一元

溫病指南

古來論溫病者稱吳鞠通與王孟英每部實價銀一元
 王氏備用清涼對濕溫治法論列尤精堪稱近世
 後半專論濕溫而于濕溫治法論列尤精堪稱近世
 本

新批女科歌訣

本係重集女科之精華編成易讀之歌訣復經女科
 其欠生小重行編詳加批語揚其所長實用之良書
 實價銀四角

曹穎甫先生醫案

上海名醫曹穎甫先生醫學精深治術速效世所共
 謂其治病投藥祇須一劑可愈也今由其門人曹
 案之精華記其治療之結果可作為醫家之指
 蘇州女科名醫王慎軒先生以多年治經之生
 醫書凡婦女經帶胎產奇病怪疾諸症如從名
 細載錄接症說明能使初學者諳此如從名師
 此如得良友切磋

庭醫藥常識第一集 實價銀三角
 本刊文義淺顯學說新穎認公關內容豐富早為閱者所
 相推第一集早已售罄故特重行編印成集仍與預訂者相
 承接裝訂美觀並為優待閱者起見其定價仍與預訂者相
 此係陳弼生先生之治驗筆記其辨症如鏡鑿形其處方如
 走盤或舉同病異治者詳辨之或舉古今之誤者糾正之洵
 醫界不經見之良書非若他書之描摹影響者所可比也
 再版胎產病生理學 全書一冊 實價銀一元

胎產病生理學 全書一冊 實價銀一元
 此乃中國胎產書中最新之創作也采集中西之精華參入
 證之經驗將種子懷胎胎產產後各症之病理逐一詳述
 無不切合實用初版業已售罄今已增訂再版較前更勝
 家庭實用良方 每部實價銀六角

家庭實用良方 每部實價銀六角
 是書係集經驗簡便之良方編成家庭實用之醫書凡內外婦
 孺各科以及跌打損傷急救中毒戒煙難治諸法無不應也
 有且詳列之方悉有功效簡便切用誠為家庭必備之書也

家庭實用良方 每部實價銀六角
 是書係集經驗簡便之良方編成家庭實用之醫書凡內外婦
 孺各科以及跌打損傷急救中毒戒煙難治諸法無不應也
 有且詳列之方悉有功效簡便切用誠為家庭必備之書也

(外埠函購寄費加一郵票代洋九折五)

藏書家鑒

本社刊行家藏古今醫書。實有五大志願。一為宣揚中國醫學之文化。二為保存中國固有之學術。三為普及醫學之學識。以盡滅除人民疾苦之義務。四為通流醫藥之孤本。以副先賢著述濟世之初衷。五為宣佈醫界之祕訣。以打倒守祕之陋習。是以不惜精神金錢之犧牲。而願刊行醫書也。如藏有各種醫藥書籍者。或願公開流傳。或願割愛價讓。本社均極歡迎。請即將原本交郵掛號寄下。或先示明書名書目卷數。及著作人名等。俾可接洽也。

蘇州國醫書社謹啓

中華民國二十二年六月出版

(女科指南集)全書二冊

每部實價銀圓八角

外埠郵費

著作者	申江戴武承
鑒定者	古越王慎軒
校正者	古越王景賢
出版者	中國醫學研究社
	<small>蘇州吳趨坊一三七號</small>
發行者	蘇州國醫書社
	<small>蘇州西中市四十六號</small>
代印者	蘇州文新印刷公司

版權所有
不准翻印



